



T 3205/2524.81

9





儀徵志卷第十八

名蹟志下

墓

義塚

墓

明兵部尚書單安仁墓在舊江口通真觀東隅

中和處士陳貴墓在七里北山子浙江按察副使善墓附

翰林學士解縉陳氏先德碑銘曰真有陳氏潁川之族桓桓武

功綿綿盛福其福維何世濟陰德德無大小唯在於積積而無

間覆篲成山廣為其易豈必擇難曷不觀之陳氏之先職卑志

崇而主拘孿飽其餓飢施之湯沐其仁幾何惠及一獄其年既

長賢嗣克生有孫遇時煌煌錦榮歷踐鼎台進未可量我作銘

詩世服其常 按察副使劉咸撰善墓表略云聖朝有廉能之

吏曰浙江按察副使陳公自筮仕至終三十年其操行介然如

哈佛大學漢和
圖書館珍藏印

一日後領司事應覲於朝染疾而卒於京師既而公之子靖奉公柩葬於其邑蜀岡之陽迨今九年而封植之制尚未備其平生所守於此可徵矣宣德甲寅秋予奉命至揚拜公墓下而公次子端爲邑庠生以予知公之詳偕其師教諭王君麟來求予文表墓初予與公同官河南時靖方弱冠端猶童穉未識事及公之喪靖克葬公以禮端亦克思以圖其親於不朽則夫仁人君子之必有後於此又可徵焉公生洪武七年五月歿於宣德元年四月享年五十有三

浙江按察僉事顧謙墓在蜀岡

祭酒陳宗敬撰謙墓誌采入列傳錄其銘銘曰博達之學焯焯科第專論不辱擢振風紀伍籍既清妖寇削平剖符建司東方底寧皇仁憫窮博施藥榘公奉唯謹生死有濟皇仁憫饑有饘

有糜飽哺熙熙公實主之內司喉舌外僉臺憲歷事五朝承天寵眷昔有二疏公遂引年功成者去天道自然壽考令終夜旦恒理埋銘北岡永耀百世

李猶龍詩顧公首制科蔚爲江上寶丰稜試皇華駢駢在周道南詔清伍符山左戢盜擾卓哉御史才銅章知眷早御賜恩寵隆須公起飢殍全活衆以多京邑鞏新造銀臺遽謫歸觀察聊小草未及罄鴻猷費用一邱老北山馬鬣封琬琰僅遺藁淵源發祥人慨焉傷懷抱

戶部郎中彭真墓在蜀岡

大學士高穀墓表略云公姓彭氏諱真儀徵人也由鄉貢入太學歷官至奉政大夫戶部郎中自親事以來年踰六十即上章乞骸骨歸置圃於家名曰小林泉藝木種蔬客過則飲酒賦詩

摘鮮淪茗。為盤餐具。盡一日之歡。如是者數載。予嘗較試京闈。因往還過其家。得以傲睨泉石。坐所謂小林泉者。與公談笑。敘舊終日忘倦。今幾何時。而遽止於是耶。其可哀也已。故謹掇其所知於公之萬一。俾來者有所考焉。吏部侍郎魏驥墓誌略云。公端士也。予與之同朝。嘗知其為人。讀書飭行。自少有譽於鄉。用蔡氏書膺鄉薦。試春官。不利。入太學卒業。選拜靖江王府審理正。克舉厥職。王寵遇之。改大興知縣。工部主事。遷戶部郎中。所至茂績。聿彰。綽有佳譽。居戶部凡八載。以足疾上章乞歸。唯日與所知者。逍遙詩酒。以適其適。人視其年德。彌增踐履。彌篤方期。永好。以儀表閭里。孰意遽歿。實正統丙寅四月也。享年六十九。平生性耿介。樸儉。不妄與人交。莅官忠謹。歷事四朝。幾四十年。成績屢臻。且無疵類。豈非縉紳難能之士乎。子七人。孫四人。以是年九月。葬於蜀岡原。與其配陳氏合兆焉。長子京。以狀求予銘其墓。故序而銘之。銘曰。少志既立。壯學克行。維忠維謹。靡驕靡盈。敷歷四朝。昭昭令譽。山行之篤。譽實奚愧。公雖歿矣。不歿者存。欲考其德。視此刻文。

禮部郎中朱信墓在蜀岡

吏部侍郎魏驥墓表略云。嗚呼。此蓋禮部郎中朱君存忠墓也。存忠名信。其先汴人。洪武間。始遷儀徵。信少孤。事母及兄。以孝友著。由貢入太學。上吏部試。高等。擢工部主事。調戶部。遷禮部郎中。在任幾二十年。人皆以為能。存忠不自以為足。而益克慎其職。年未六十。即疏乞歸。真急流勇退人也。正統丙寅正月。以疾卒。年六十一。子三人。孫七人。家嗣鑑以其執友。山西叅議尹君廷資。狀求予表其墓。惟人之生。愧無學以植其身。愧無聞以

名其後。公其庶幾。有學有聞者與。

嘉興知府柳琰墓在焦家山

給事中張寧墓表略云。嘉興太守柳公卒。郡大夫士庶咸哀思不已。胥謂宜表其墓。以詞見命。寧雅知公。不敢辭。亦不敢佞。謹書其實。公名琰。字邦用。世家儀徵。平生孝弟。公忠敏勵清約。出自性原。學力執正。不可回撓。自爲進士。歷官主事。薦知嘉興府。事險夷逆順。不變所守。用能所至。有聲吾郡。自楊公承芳後。有本之治。公一人而已。惜以憂勞。疽發背卒。年五十有七。公美不可勝紀。予特表其大者。兵部尚書項忠銘云。榷楠之材。可棟可梁。藍田之玉。宜珪宜璋。夫何見重。復被毀傷。公之處世。屈而復伸。仰又遽亡。得無相妨。隨處政聲。足展懷抱。所謂伊人。國之大寶。樞返故鄉。安厝高岡。山迴水繞。子孫世昌。我今銘詞。發潛

幽光。過者式瞻。永久弗忘。

贈都御史黃儀墓在蜀岡黃瓚父也

吏部侍郎儲瓘墓誌銘略云。公生永樂甲午七月。春秋八十有一。以弘治甲寅正月卒。十月祔葬蜀岡之原。嗚呼。公少履遭迍。而賴母氏以克樹立。乃生賢子。作賓於王。以顯融其家。以此論天之於公。果無意乎。矧公年耆德碩。軌範鄉閭。今不可復見。其誠可悲也。已。而况嘗受益於公。若瓘者。其情又何如耶。銘曰。惟母之珍。克培其初。惟嗣之良。薄發其餘。猗人之定。天竟與俱。我銘諸石。用警厥愚。

兵部侍郎黃瓚墓在縣西二十里棗林岡

吏部侍郎陳鳳梧撰神道碑銘略云。嘉靖甲申冬十月望日。南京兵部右侍郎黃公。以疾卒於家。部使者以聞。且疏公平生清

苦之節於是上追悼賜祭令工部造墳以葬其子監生襄以公
三品得樹碑於墓道詣予請文予辭不獲乃按趙憲副叔鳴之
狀而敘之公諱瓚字公獻先世常熟人國初始占籍揚之儀徵
父儀娶許氏生公自少性簡重不妄言笑不與羣兒嬉年十五
補邑庠每宿號舍秉燭至夜分提學御史戴公珊深器重之成
化庚子舉鄉試甲辰登進士第上吏部適弘治改元授公南京
戶部廣西司主事進本部河南司員外郎父憂服闋遷江西司
郎中擢四川布政司右參議督理松潘糧儲母喪起復轉本司
左參議陞浙江布政司右參政入拜應天府尹超陞都察院右
副都御史巡撫山東擢南京兵部右侍郎以直道不合遂引年
歸杜門却掃鄉人罕見其面士大夫過者輒就而問之三載屬
末疾不起享年七十子男一即襄公外貌古朴而内存沉靜泣

官禦物一以簡鎮之人不敢犯平居寡言至論經史辯政事則
亶亶不倦與人交既不苟取亦不苟與以是寡合其儉素出於
天性雖貴而顯敝衣蔬食有寒士所不及者鳳梧素慕公名頃
年承乏山東稔聞公之清德及改家留臺道經真州獲拜公焉
談論移時清真而率自是音問不絕詎意僅別一暮而公竟不
可作耶兆在城西棗林岡兌山震向之原葬之期則丙戌年九
月十六日也銘曰世道日降俗澆以漓侈靡相近剛介者稀嗟
嗟雪洲性廉而簡筮仕郎曹恪守界限敷歷外藩敷政惠民崇
儉黜奢綽有賢聲迺尹京兆乃撫東土坐鎮雅俗返於淳古佐
留戎務禦難安邦寵錫駢蕃謙不敢當歸老於家篤學弗倦著
述孔殷名勢斯遠溘焉長逝哀榮始終國失典刑後進焉從有
鬱其邱墓道如矢琢辭於石用詔無已 大學士楊一清銘曰

江流自岷東匯儀徵沃溪源遠鍾爲聞人公資旣竒器識亦遠
拔穎鄉賓揚翹文苑秦淮翔泳蜀道驅馳仕優學治惠及戎夷
維湖江右維浙分守載旬載宣王澤下究三月京尹賦省風移
職憂圻甸財匱民疲旌燾揚揚循岱及海暴戢良懷凜凜風裁
留漕貳政宏我本兵威茲強叛公也維城歸有餘榮縣車故里
終始道腴左琴右史皤皤國老胡不憇遺經生之慟梁木其萎
國典輝煌賜葬與祭允穆高風播於來裔

鄉貢進士蔣鑛墓在寶家山

侍郎黃瓚墓銘曰材豐於天行諧於人薄起而翔唾取國賓乃
鍛其翮曰遊成均我師我友居之誥誥爰取其益匪同其塵命
也何其千古不辰

戶部員外郎陳濟墓在蜀岡

刑部郎中王大化墓銘曰吉兮栗兮先生質兮道兮嵩兮先生
抱兮先生之器兮唯不樂兮先生之澤兮唯無斁兮先生之藏
兮唯終吉永康兮

刑部郎中王大化墓在胥浦橋外王大用撰誌銘今不存

李猶龍詩解額占南畿王公聲譽好辛巳應制科風雲遇殊巧
高唐號神君惠政成懷保樵李歌采風得民豈云小循良匪無
人如彼古心少水曹漕渠通讖決滋明了奚爲忤時流黜白用
顛倒拂袖臥江雲四庫縱探討詩律精以深文章格亦老竒情
鬱未舒玉樓賦何蚤

按察僉事陳輔墓在銅山

僉事陳憲誌銘惟君之質厚重如山惟君之才流通如水厥修
於茲川罔弗理天奪之速人將如何功業未竟聲稱不磨

參政蔣山卿墓在小銅山之西尹家山文徵明撰誌銘今不存

李猶龍詩蔣公負個儻弱冠振六翮抗疏干天威星辰黯無色
芬芳一世間風流追古昔白雪倡高言人人自辟易疾風鼓江
濤朝霞燦斗域蛾眉一成妬及艾已投効肥遯南泠隈開徑延
三蓋車馬羅廣衢漆翰日相索明月沉海底千秋仰遺則

光山知縣朱永年墓在縣東北崔家窪志銘不存

李猶龍詩明府鬱靈氣栖栖蓬藁間豈以寒羶困乃重墨綬牽
拂袖謝時貴歸種南山田形骸偶土木神遊千古前聿開先秦
軌東漢匪所妍仰噉太乙精落落吐雲煙縹囊函五色綵筆大
於椽咄嗒文章伯皎好姑射仙九原如可作鞭弭以周旋

盛稔墓在城北雙橋吏部尚書趙煥撰志銘

孝廉張渠墓在小銅山志銘不存

李猶龍詩張公與博人寧直經明爾雖復舉孝廉所嗜惟圖史
家藏萬卷書牙籤映軒几南面未足榮鄴架安可比著述歷歲
年邑乘何斐煒自謂一家言義例班馬擬婆娑江上園傲然竟
弗仕下世幾何時庭臺遽傾圮先人殷幽懷重構新遺址桑田
豈果常盈盈湛江水

贈國子學錄倪可大墓在朴樹灣妻戴氏附

靖南侯黃得功墓在青山

贈僕少卿劉欽隣墓在青山

李天馥紀劉富川死事詩南荒昨夜羽書通特紀儒臣引決雄
十郡流官傳小吏蠻烟眇眇動宸衷千秋峻節峙崑崙志決身
殲運獨屯自有精靈能殺賊不教海島遁孫恩花城幾載著循
良報國真為大國光更幸新恩優任子豐碑特葬舊衣裳一片

丹心自不灰丈夫如此復何哀故鄉好薦招魂賦瓜步江潮白
馬來 王士正詩白沙江上別蒼茫憶爾廬陵節義鄉萬里青
燐連桂管三年碧血照清湘烏啼濺淚逢寒食馬革驚心裹戰
場望斷銘旌何處是蒼梧愁絕暮雲黃

浣紗女墓在縣西雞留山之南

郭貞婦墓在西沙清水潭上

宋濂傳略云郭氏名丑字道安六合人也美姿容通詩書大旨
歸同里鄭元元頗力學後因有不可言者欲侵陵之道安厲色
叱去徐曰此人倫之變也倘泄祇揚惡耳即潛出沈於河時洪
武十年七月也父彬收瘞揚子清沙後屢夢其自言為長蘆水
神云

孝婦張氏墓在村樹灣

節婦劉氏墓在城北七里井臧家營

義塚附

宋漏澤園在胥浦西舊志云在胥浦之西紹興三年運判趙師聿
於北山東城子山剏東西二阡東以待士之無歸者西以處民庶
貧無棺者官給之置菴曰普慈以北山寺僧主其事月給常平倉
錢米榜曰北山阡今廢

明官河義塚在城東五里漕河南隄弘治十六年工部分司呂夔
創建以瘞飢死者正德嘉靖間工部使李汎張鍾相繼修復

黃瓚記云夫官守之所不與吏議之所不及而吾力足以為之
則盡吾心焉矣夫人常鯁鯁焉於其文法之督責非則或置之
而掩骼埋胔又其所甚置者吾誠不忍於是也顧非吾責耳夫
非吾責而為之不幾乎越俎之嫌哉雖然彼置而弗為吾以嫌

自諉而弗為使上之德澤不下究則嫌者與置者等也虞部主
事呂君分署於真當夏旱饑流離斃茲土者無慮千計君乃約
已省事悉意以甦民民欣若更生焉已而相地城東五里漕河
南隄得若干畝縱二十有八丈衡三之一繚垣樹門題曰官河
義塚分勅坊衢日以殍告瘞之又推行之瓜洲鎮於是耆叟咤
歎謂君此舉皆前所未覩也嗟乎使君局於所署則堰廂簿書
之政耳孰與濟荒况並舉之乎昔漢曹褒陳寵為射聲廣漢也
皆以守臣收瘞骸骨范史述焉今君之因事力義則加於褒寵
收群壑流殍而窀穸之則倍於射聲廣漢而其所以為心者則
謂塚以義稱天下殆有無塚者矣蓋自井田之制壞雖治世不
能無失養之民猝遇饑歲公私枵然是時方圖所以濟之其不
流離轉徙為溝中瘠哉要之家有常業郡國有常廩然後民有
常土義塚可無作也塚之義義之醜也此君之所以為心而鄉
人請記之意或未之亮乎故告之

河北叢塚在城東運河之北即河北菴地也

張桀弔叢塚賦并序真俗惑於風水或久不克葬又五方通衢
人多旅櫬率以靈柩舁厝寺中或致失所在城北則北山寺城
東即此菴也曩余訪東園翁道過菴側見大窖中縱橫數十柩
訊之路人皆云劉都閫令人自菴曳納其間今逾年矣無為之
掩者因竊喜其有救弊正俗之意然不應久暴壞棺使莫克以
圖葬耳後聞非其本心實緣新建叅府與菴逼近懼上官見惡
遂有茲舉悲夫胡使民至此乎余時即思鳩工藏之會雨弗果
及後再過已成大塚蓋亦義人或其棺主皆不可知乃作弔叢
塚賦哀焉有司者倘興漢褒寵之念亟將頽菴廢為義塚不惟

廣仁且以祛弊因并書之以告良牧云歲疆圉之作噩兮月令
度其季冬余將適乎東郊兮睇桑翁於養慵道河干之北陬兮
昭廢刹而如壙中古塚其累累兮多露骸之紛縱嗟敝俗之寄
厝兮託釋宇以相從年既邈而莫寔兮疇若堂之可封彼戎臣
之憚咎兮率亂投乎巨坎雖末流而罔遏兮遑克端其大本致
物故之久暴兮奚坏土之可掩惟盡闢以廬其居兮俾來者之
溥歛嗟蜡氏之失職兮疇令埋而置揭豈日月之可書兮縣器
服以待發昔姬后之施澤兮亦必及其枯骨彼褒寵之賜郡兮
恩均庇夫旣歿消陰雨之悲聲兮靡停櫬於歲月史氏述以廣
仁兮庶牧道之表白世教弛而政靡兮民失養而多艱吏草菅
乎邦本兮奚慈愛之克宣恣饕餮以罔下兮曷惜逝之弗_且粵
儉歲之鮮食兮民流離而靡痊睽溝疾而彌望兮將殘者之亦

酸埒鳥獸以相食兮疇克濟乎衾棺積殍肖於邱垤兮日慘慘
而悲風彼部使之惻愴兮圖義塚以為阡昇藁裡而歸窀兮跪
陳辭而祀旃涕淫淫其如雨兮矢民瘼以問天事雖逝而赫赫
兮若將覲乎睫前何先哲之愷悌兮茲莫企其仁賢彼司馬之
感義兮述豐碑而表鐫余黽勉以繼志兮哀旅魂之嫺嫺思命
錫以昇瘞兮庶遺體之可全廓民胞以公愛兮豈陰報而期傳
邁時日以命駕兮溘斧屋而如巒彼姪美以信義兮曠余心其
同然爰述德以標矐兮將有禪乎顛連或循牧之有知兮溥茲
義於八埏申皇仁之不逮兮庶漏澤之無偏

西義塚在城西門外里許官路側嘉靖間歛汪景貞創置延袤二
十餘畝周以棘垣樹以門柵為屋數椽傭人守之

新漏澤園隆慶元年知縣申嘉瑞創建即邑厲壇廢址

王氏義塚在城北二里

口記曰槎溪著姓蓋有王氏云王自先世代不乏雋垂及光祿四溪蒸蒸平有茂德表行之誼余竊慕之迺茲分署浙省有使來請言記其義塚則又嘉其仁恤周至視近世之攘握封殖坐觀物故而莫為之所者蓋不啻絺蒌也已遂為之記四溪自其大父商真邑邑城北二里許置園一區長四十丈濶二十八丈足可瘞骼公猶虞其地狹而瘞衆也復請治官岡一區以待瘞者長三十八丈濶三十四丈計可容萬餘塚其地去城為近而城西南群處無歸者瘞之弗便迺又置地於城西三里而近長四十餘丈濶三十餘丈為義塚焉夫士君子進則施恩廣惠以子黎元退則推餘利物以溥咻噢四溪家食時利濟為心若此他日立朝持政推此而施之天下群黎百姓有不仰其覆載者

耶余與四溪有桑梓松蘿之雅聞茲義塚之置竊有感於其舉故以此申其義四溪名汝立字成甫四溪其別號云

論曰余志名蹟凡三卷或謂之繁嘗觀宋史使者苦濤欲撤東園為佛寺馮去非為幹辦力爭去官夫何愛於東園哉昔人謂洛陽名園之盛衰關天下之治忽意者以真州當東南之水會儻亦有見於此乎又聞邑中黃司馬昔曾輯縣志以范氏義門無考當時憾焉志用弗成邑之人嘗言蜀岡耕者誤得古隧道以封之固不敢發門甃有太和字自是唐時墓正不知何人葬此此特幸而不發耳近郭有王氏義阡舊置二丁司掩瘞官忽逮之為他役亟辨乃免蓋皆軼事之可鑒者也余以是不厭詳并及今蹟焉恐今不存或久而益失之云

贊曰我思古人爰愛其蹟一邱一壑徘徊弗釋烟月亭臺荆榛第

宅馬鬣遺封於焉藏魄道左壘壘亦為心惻

祥祲志

木

火

土

金

水

木

宋德祐二年真州樵人破樹成字

文天祥詩序云予至真苗守再成為予言近有樵人破一樹樹
中有生成三字曰天下趙亟取木視之果然木一丈二尺圍其
字青而深半樹解揚州半樹留真州三字瞭然不可磨也真州
號迎鑾藝祖發迹於此豈非在天之靈所為乎詩云皇王著姓
復炎圖此是中興受命符獨向迎鑾呈瑞字為言藝祖有靈無
明嘉靖十八年十月雨木冰二十七年十月雨木冰四十四年正
月雷雪交作木冰

國朝康熙十九年冬木冰二十年元日木冰三十一年元日木冰
五十三年十二月夜霧木冰

恒雨宋嘉祐六年七月淫雨為災隆興二年七月霖雨壞田傷稼
乾道三年八月霖雨禾粟多腐淳熙三年五月積雨損禾麥十五
年五月連雨大水十六年五月霖開禧十六年五月霖雨大水無
麥禾

明成化八年秋大雨鹽舟漂溺嘉靖七年七月淫雨大水害稼十
六年自正月至四月恒雨五月六月大霖雨田盡滄沒萬厯二十
六年夏淫雨傷麥

國朝順治十六年自二月至三月大霖雨平地水深尺餘

服妖明天啓間男子衣紙衣五色崇禎末衣紙者尤多吏民更為
高幘頂圓大而踣號隨風倒

鼠妖元至正一十六年有灰色鼠覆地食禾

國朝康熙四十八年羣鼠銜尾橫江南渡

火

宋淳化三年十二月建安軍城西火燔民舍官廨殆盡紹興七年
二月真揚州火咸淳元年二月二日火二十五日丑刻火午刻後
火一月三火居民蕩焚僅存客館及漕臺州治

元延祐元年二月真州揚子縣火二年二月揚子縣火發米減價
賑糶至治二年四月真州火

明正德七年大火燔城下民居數百家

舊志云先是有妖人乞於塗獨孫氏厚施之及火起人家牀下
篋中咸有綿裹火煤覺即滅之孫氏獨無火驚城下多草舍乃
爾燎延是時人多見飛鴉含火近火孽也

嘉靖十一年秋有天火大如斗墜于城南燔民居延及柴舟大風
吹舟載火過河兩岸燔數十百家十七年春數火燔民舍千餘家

萬曆二十一年城內火知縣許一誠建都火星廟祀之
國朝康熙十一年秋天寧寺塔火五十六年冬縣丞衙火城外燔
民居三百餘家

恒燠明嘉靖八年冬無雪

草妖宋嘉定三年城市田野多產芝

元至元二十二年江淮蘆荻多為旗鎗人馬之狀節間折開有紅
暈成天下太平四字

明嘉靖十三年鄧氏宅產芝一本三苞三十六年民間產白芝

國朝康熙初御史鄭為光宅產芝

羽蟲之孽國朝康熙四十八年有野鳥千百成羣集城中林木

爭鬪鳴噪達曙不止

赤眚赤祥嘉靖五年五月有流火自東北向南光若迅雷十六年

有流火如斗南隕民田崇禎十二年五月隕紅砂十三年西方紅
氣亘天至冬不變

水沴火明成化十六年八月黃氏井中火光高數丈

土

唐上元二年秋大饑長慶二年饑開成六年饑大中六年夏饑光
啓三年大饑斗米萬錢大順二年春大饑

宋建隆三年饑

戶部郎中沈義倫言饑民多死郡中軍儲尚餘萬斛今以貸民
至秋收新粟公私俱利有司沮之曰若來歲不稔孰任其咎義
倫曰國家以廩粟濟民自當召和致豐寧憂水旱從之

淳化五年民饑景德元年饑二年饑大中祥符四年饑五年饑七
年饑明道元年饑二年饑熙寧六年饑宣和五年饑紹興元年饑

十一一年饑令通商移粟三十二年秋民乏食令發米以賑淳熙七年饑紹熙三年饑令出粟賑之五年饑慶元元年饑六年乏食令守令賑之開禧二年饑嘉定元年大饑人食草木多流亡詔發廩廣糴賑糶勸分二年大饑斗米錢數千人食草木刲道殣食盡則發瘞膏詔發廩賑施置粥院為康以活之六年乏食八年饑十七年乏食令通商勸分

元大德三年饑九年饑十年饑至大元年大饑人食草木至治三年饑賑之天曆一年饑元統元年饑

明景泰五年饑免田租弘治十七年大饑嘉靖元年饑二年大饑人相食水陸殍屍千萬遣戶部侍郎席書發粟賑之十四年饑崇禎十三年大饑十四年大饑蜀岡有土白如粉爭掘取為食名曰觀音粉

恒風唐開元九年七月暴風發屋拔木十四年秋大風自東北海濤沒瓜步天寶十載大風駕海潮沉江船數千艘

宋元豐四年七月大風飄蕩沿江廬舍損田稼紹興二十九年九月大風水為災

明萬曆七年大風拔木十一月大風壞漕舟民船千餘崇禎五年正月大風濤十五年五月朔大風天雨砂損二麥

國朝康熙二十年五月大風發屋拔木
華孽宋紹興四年七月漕解東池及東園并產瑞蓮
明正德八年三月月宮菴桂樹生華

羸蟲之孽宋淳熙二年五月螟淳熙二年秋早有螟害民饑甚詔賑以常平米弛賦通商

後漢書五行志云羸蟲之孽謂螟屬也

木火金水沴土唐大足元年七月地震

明嘉靖四年夏地震十六年三月地震萬曆十二年十月地震崇禎元年九月地震房屋動搖有聲十一年西門外地裂長數丈闊數尺屋宇傾壞

國朝康熙七年七月地震有聲如雷五十一年十一月地震二十餘次

土為變怪唐垂拱元年九月地生毛或白或蒼長者尺餘徧居人牀下大如馬鬣焚之臭如燎毛

金

隋大業十三年冬有石自江浮至揚子

按漢書五行志劉歆云金石同類

恒陽唐貞元六年大旱井泉竭人死七年旱永貞元年秋旱元

和三年旱四年秋旱七年夏旱寶曆元年秋旱大和八年夏旱大中九年秋旱饑民多流亡遣使巡撫淮南減上供餽運蠲逋租節度使杜棕荒于游宴上聞之罷棕以崔鉉代咸通二年秋不雨至于明年六月

宋咸平元年旱寶元四年春旱慶曆四年春旱遣內侍詣淮南祠廟祈雨熙寧七年自春至夏久旱九月復旱八年八月旱饑大觀二年大旱自六月不雨至于十月政和元年旱宣和元年秋旱紹興二年夏旱三年夏大旱隆興五年夏秋旱七年春旱淳熙五年八年旱十年夏旱紹熙二年夏旱嘉定八年大旱十一年旱無麥苗景定五年自二月不雨至于六月

元大德二年冬旱至順四年夏旱至元二年旱

明正統三年旱免田租成化八年春大旱正德元年旱三年旱嘉

靖十一年自正月不雨至于四月十四年自五月不雨至于八月
十七年春夏旱十九年夏旱萬曆十七年大旱三十五年夏大旱
崇禎二年夏旱十一年井泉竭十三年大旱十四年大旱

國朝康熙六年春夏久旱四野皆赤十六年秋大旱五十五年旱
詔免縣衛被災地畝稅銀十之三發穀一萬九千石賑之攝縣事
郡丞胡璉代災民輸糧七百石

訛言唐建中三年秋訛言有毛人食人心人民大恐
元至元三年訛言朝廷欲括童男女於是鄉城競相嫁娶貧富長
幼多不得其宜

明崇禎十一年七月人染羊毛疹謠言挑人筋膜惶懼禱賽徧于
城野

毛蟲之孽宋紹熙五年產白兔

國朝順治七年虎至東郊傷數人守備吳德輿斃之十六年虎至
北郊守備蔣箕斃之康熙十一年虎至西郊傷人遊擊梁某斃之
五十四年虎至東門外守備張宏久斃之

水

唐大曆十年水災貞元二年六月江溢三年三月大水八年大水
害稼漂沒廬舍永貞九年秋大水害稼元和四年夏大水害稼七
年秋大水害稼開成四年夏江溢大水害稼咸通七年夏人水害
稼

宋乾德二年四月潮水害民田太平興國五年水潦民饑大中祥
符四年六月大水六年七月江水溢壞官民廬舍乾興元年水災
天聖二年大水漂溺民居揚子尉胡宿率公私舟以濟活數千人
四年九月雨水壞民廬舍六年七月江溢壞官民廬舍元豐八年

大水元祐八年月水重和元年夏大水民流移漂溺者衆遣使賑之發運使任宗諒坐不奏屬地災勒停紹興二十七年大水開禧三年水紹定四年水

元至元十九年大水二十九年夏大水元貞二年夏大水大德五年七月朔晝晦暴風起東北雨雹兼發江大溢高四五丈沿江之地漂沒廬舍

明景泰五年大水六年江水泛漲遣官齋香帛祭文命巡撫都御史王竑祭江神嘉靖元年七月大風雨江溢平地水湧數尺壞官民廬舍漂沒者數百人三十五年大水廬舍漂沒命賑之萬曆七年江溢二十二年大水二十四年江河水溢漂沒廬舍四十年春大水平地水深數尺漂沒廬舍害田稼崇禎七年江溢漂沒者無算九年夏水十一年春水

國朝康熙二年九月大水城市皆滄居民漂溺總督郎廷佐以兵船拯救

恒寒宋雍熙一年十二月江水冰

明景泰五年正月大雪竹皆凍死隆慶三年冬大雪簷冰長丈餘萬曆三十年三月大雪天啓七年十二月夜雨電早復大雪

魚孽唐長慶五年夏蝗開成三年螟蝗害稼五年夏螟蝗害稼九年蝗民饑咸通三年夏蝗九年旱蝗光啓二年蝗

後漢書五行志云魚孽劉歆傳以爲介蟲之孽謂蝗屬也唐書五行志云先儒以爲魚螺變爲蟲蝗故以屬魚孽

宋大中祥符九年七月蝗天禧元年二月蝗六月大風吹蝗入江或抱草木僵死寶元四年春旱蝗建炎二年夏蝗崇寧元年夏蝗紹興三十二年夏蝗淳熙九年秋蝗真揚泰州害撲蝗五千餘斛

十年夏旱舊蝗遺育害稼時有禿鷲食蝗飛者以翼擊死詔禁捕
鷲嘉定八年四月蝗食禾苗草樹皆盡

元大德二年夏蝗六年秋蝗至大元年秋旱蝗

明景泰七年旱蝗嘉靖八年六月飛蝗積者厚數寸長數十里食
草樹殆盡數日飛渡江食蘆荻亦盡八月蝗復自北來羣飛蔽天
其積者綿亘百里厚尺許山行者衣履皆黃禾稼不登都御史唐
龍奏請發廩賑之九年秋蝗十年七月蝗十一年五月蝗十四年
秋旱蝗十五年四月蝻將作縣令揚子伸諭民掘取其子每升償
以斗米成蝻者穀半之積數百斛會連雨盡滅故不傷稼萬曆十
八年旱蝗崇禎十一年秋蝗

國朝康熙六年蝗入境不傷稼

雷電宋咸淳二年六月大雨震電

明嘉靖九年十月雷十一月又雷十五年六月數震電人及牛畜

屢有斃者閏十二月震雷電大雨數日十六年正月大雨雷電崇

禎九年正月雷十年正月雷十二年正月雷

霜電明正德十五年六月雨雹城市大如果實山野有如鵝卵者

嘉靖十一年三月大風雷雨雹四十五年四月大雷電雨雹崇禎

三年夏兩雹

國朝康熙二十三年四月隕霜

黑眚黑祥明嘉靖三十五年三月河水變黑臭崇禎十二年春西

郊雨黑子如豆十七年四月有黑氣自北而南其長竟天

火沴水唐開成二年夏旱運河竭元至正初揚子江竭舟楫皆闕

于塗中露錢貨無數蓋累年覆舟遺物也人爭取之潮至而走有

不能及岸而滄者如是累日始復安流或曰此江笑也

明成化六年秋至七年春大旱運河竭車馬往來成平地嘉靖二年旱運河井泉皆竭

恒陰唐光啓二年自十一月陰晦雨雪至明年二月不解

明嘉靖二十一年黑霧連日至未不解氣腥穢逐人二十步外不能相見

龍蛇之孽宋建隆元年真州有龍異

先是宋主從周世宗征淮南戰于江亭有龍自水中向宋主奮躍人多驚異以爲出潛之兆

宣和六年發運使開靖安河禱于神有異蛇見筵間鱗彩綉錯

明嘉靖十六年五月有白龍見雲中

國朝康熙六年十一月有四龍見于城西南

人疴宋開寶九年揚子縣民妻生男毛被體半寸餘面長頂高烏

眉眉麓密近髮際有毛兩道軟長眉紫唇紅耳厚鼻大類西域僧

至三歲畫圖以獻

明嘉靖十三年冬民妻一產三男隆慶三年五月劉指揮妻一產三女

疫唐貞元六年疫大順二年大疫

宋紹興三年疫淳熙四年大疫嘉定元年大疫

明嘉靖三年春夏大疫四年夏大疫

論曰祥禳所時有也自漢儒災異之學興率本之洪範五行沾沾然言其事應一休一眚必推驗其所由然其有不可推者則不免於支離遷就而自戾其說唐書歐陽氏固議之猶不能不仍其稱而襲用其目豈不以相沿之久有不能以遽改者歟兩漢五行志附五事於五行附五行沴天於皇極而歐書無之茲所爲類竊倣

儀徵志卷第十八
歐書取其大槩相從耳若夫君子謹於災變惟盡其在我者而已
拘拘五行之為類又何足多置辯焉
贊曰天道幽微物理渺茫有失其和乃反厥常惠吉逆凶人事孔
彰能懼而修何有不臧五行之占漢儒所詳

儀徵志卷第十八

儀徵志卷第十九

列傳一 宦蹟

宦蹟

唐獨孤勉河南人高宗永淳間析江都揚子鎮為縣勉首為令
康令失其名咸通中為令時大旱令以身代犧禱於江赴水死天
大雨民悲懷之立祠以祀在義城村

按舊府志云長民者為政有經未聞憂旱而以死禱其事疑傳
訛不可為訓然於時郡縣吏無可述姑存其舊

周朱昂字舉之衡山人博學人號為朱萬卷北遊江淮周世宗征
南唐韓令坤統兵至揚州昂謁見陳治亂方略令坤奇之表授揚
子令時兵興民逃亡過半昂便宜綏輯逋亡復業者七千餘家邑
中稱治入宋為殿中丞翰林學士

宋喬維岳字伯周太平興國中任淮南轉運使時淮河西流三十里曰山陽灣水勢湍悍運舟多覆溺維岳親行規度開故沙河自末口至淮陰磨盤口凡四十里建安軍有五堰運舟皆卸糧而過時壞舟失糧綱卒緣以為奸潛有侵盜維岳始剏二斗門於河西第三堰二門相距踰五十步覆以夏屋設懸閘積水俟潮平洩之建橫橋岸上築土壘以固其址自是宿弊盡革運舟往來無滯劉綜字居正河南虞鄉人雍熙初舉進士歷運使判官起知建安軍以天長及揚州六合民輸賦非便奏請降天長軍為縣隸揚州以六合縣隸建安軍自是民力均濟綜強敏有吏才所至抑豪舉法時稱幹治多所建白皆切時政至道初遷太常丞歷樞密直學士知開封府終

李沆字太初肥鄉人進上歷通判澶州江淮發運使置鹽倉於建

安軍運米入轉般倉空船回皆載鹽散於諸路江浙諸路得鹽

船運而民力稍寬累進翰林學士真宗朝參知政事卒贈中書人

謚文靖

薛奎字宿藝絳州人進士祥符末任發運使辭王文正公王無他

語但云東南民力竭矣奎退謂人曰真宰相之言也至則疏直揚

漕河廢三堰以便餉運後拜參知政事能知人范仲淹龐籍明鎬

皆未遇時期以輔弼卒贈兵部尚書謚簡肅

賈宗天熙中任發運使時歲漕自真揚入淮歷堰者五官私煩費

宗請濬漕渠廢三堰以均水勢歲省費十萬

魯宗道字貫之亳州譙人舉進士天禧中以右正言遷江淮發運

使通真揚漕河廢三堰以均水勢舟楫便之歲入八百萬以實京

師拜諫議大夫參知政事廷折權貴人皆憚之目為魚頭參政卒

贈兵部尚書謚剛簡

黃君俞字廷僉莆田人初強學著書百卷試開封進士第一天禧中以陳襄薦除真州軍事推官後歷崇文院校書改館閣校勘卒胡宿字武平常州晉陵人天聖中舉進士乙科為揚子縣尉時縣大水漂溺居民令不能救宿曰拯溺吾職也可束手無策乎即率公私舟以濟活者數千人後以張士遜薦召試為館閣校理拜樞密副使以太子少傅卒謚文恭

任宗誼字仲宜博平人皇祐間監轉般倉倉屋七百區敝於霖雨損米至萬計宗誼撤而新之計司各費宗誼曰倉雖在真本漕六路聚米以供京師則費宜均賦之衆是其議上之朝遂著為令

胡宗愈字元夫舉進士甲科熙寧中屢忤王安石議為邪黨所攻又以舍人封還詞頭帝惡之手詔出通判真州元祐初遷御史中

丞歷仕至吏部尚書

李釜熙寧中知真州雅為時宰所惡與同知陳求道更相告訐求道為蔡京族壻京左之釜幾蹈不測賴御史中丞蔣猷平心勘決得不寃釜居官無可考即其不畏權威蓋亦剛直者

劉述字孝叔湖州人舉進士歷知真州胡宿言其沉靜有守遷兵部員外郎神宗召為侍御史疏數王安石罪謂其建財利之議務為容悅乞早罷逐以慰天下安石欲置之獄司馬光爭之免提舉崇禧觀卒

蘇澄字道淵河南人易簡曾孫以蔭補官元豐初知真州會歲饑死亡遍境澄發廩賙貸更作糜粥食之餘民賴以存活擢江東提點刑獄

程筠字德琳饒州浮梁人嘉祐間進士元祐中知真州初為令日

嘗議新法不便神宗改容在畿內則田平役不避戚里太后以廉
吏稱之其赴真州也蘇軾贈以詩云君為縣令元豐中吏貪功利
以病農君欲言之路無從移書諫臣以自通元豐天子為改容我
時匹馬江西東問之逆旅言頗同老人愛君如劉寵小兒敬君如
魯恭邇來明目達四聰收拾騏驎冀北空君為赤令有古風政聲
直入明光宮天廡如海養群龍并收其子豈不公白沙何必煩此
翁即此可以知其風槩云

向子諲字伯恭臨江人元符末以戚畹恩補真州錄事初淮南歲
漕不通有欲濬河與江淮平者內使主其議無敢可否子諲言運
河高不可濬復堰牖故制則無患使者用其言漕復通進淮南轉
運判官建炎初遷江淮發運副使後以善李綱為黃潛善所惡罷
詹度字安世政和初知真州初至即深知民俗利病以課最墾書

褒之加龍圖閣

陸綰字權叔常熟人進士政和間知揚子兼理發運司事恤民隱
察吏奸務以摧治豪右攝服彊禦為能卒於真州著有春秋新解
三十卷詩尤膾炙人口

蔡伸字仲道莆田人襄孫宣和間通判真州時火燒民居千餘家
露處雪中伸闢寺宇官解分處之且發常平廩以賑給守者不可
伸曰此國家所以備非常也如得咎請獨當之事聞朝廷釋不問
後伸以趙鼎黨乞祠與秦檜有舊不為少屈官至左中大夫

陳邁字亨伯永州人登進士第歷淮南轉運使徽宗欲易置發運
使命選諸道計臣執政以邁言命為使時運渠壅塞詔決句城陳
公塘達於渠漕路南通而朱勔花石綱塞道舟不得行邁捕繫其
人上章自劾帝為黜勔進邁徽猷閣待制後知真定府金人圍城

傳志卷九
四
之
溝固守為部將所殺城陷金人入見其屍曰南朝忠臣也殮而葬

向子志字宣鄉開封人建炎三年江淮制置使呂頤浩委攝州事馳入即首治郭吉之叛移檄招集散亡得數百人有司憂餉不給子志謂此州昔聚酒貨最繁意務場瓦礫下必有宿藏劓之果得酒百餘斛售以充餉初吉方暴橫忽率甲士二張弓露刃至於庭子志厲聲曰汝欲殺吾何用衆為吾自斷首付汝因呼候兵授劔吉氣沮錯愕急抱劔者曰初無是心特耀兵娛公耳事定朝論偉之會高宗幸鎮江子志赴行在奏對勞問甚久命直秘閣還郡後歷知明州以剛直忤權貴被誣落職去士民訟之群擊鼓於提刑司鼓為之裂尋復其官致仕

潘殖字子醇浦城人建炎中以累舉出官調真州推官性嗜學嘗

悟新學之非述忘筌書五卷性理書九篇又畫為觀象

自謂浩然子劉勉之胡憲劉子翬皆喜其書子翬為之跋亟稱其得學易門戶於易之復

邱與字明遠仙遊人舉遺逸進書數千萬言皆恢復大計呂頤浩大奇之建炎中以論事忤權貴出知真州

張好古紹興中以朝散大夫知真州初靖康兵火學毀不存諸生解散好古至始請以城南榷貨廢屋建學從之士業復興

潘彙征字泰初溧陽人進士記問該博紹興初教授真州事親孝律已嚴不僥倖以干進歷知崑山縣治績著聞

洪興祖字慶善丹陽人登上舍第紹興中以博士應詔言事忤時宰出知廣德軍遷知真州時瘡痍之後民多流亡至則請捐租一年明年再請從之自是流民復業墾田至七萬餘畝

董將嘉禾人紹興間以左朝請大夫守真州初學燬於兵權寓城南將至始遷復舊址文廟齋舍粗備焉

元宗官左將軍與前將軍梁淵右將軍張昭協矢徇國紹興三十一年金人攻真州統制邵宏淵率三人迎敵宗突入敵營獨刃六七人力窮陷陣死之淵截胥浦橋拒戰金人奪橋斷淵左臂淵以右手挾敵同赴水死昭戰數勝後中流矢而斃州人立祠祀之

曾懷字欽道晉江人公亮曾孫以父廕歷官孝宗隆興間知真州訓習民兵有紀律張浚督師大奇之後歷遷叅政為右丞相

周孚字信道丹徒人乾道初登進士為真州教授字自七歲通春秋讀書過目成誦嘗遊書肆閱天下書殆盡著有蠹齋集三十卷張郊字彥知烏江人乾道中以監匭院丞求外補出守儀徵前守員琦獻羨緡八萬皆文具實無一金郊到郡悉以貫聞免輸以真

為揚楚之衝當築城以固人心度錢米費郡有上供與經制羨數可用因請降給三萬緡發近屯兵二千人自督役不再閱月樓櫓屹立而民不與知帝聞代歸

張大經字彥文南城人紹興中第進士乾道中知真州時兩淮鹽司帥守多興事邀功大經獨以平易近民民咸德之孝宗召入除監察御史多所建明歷進龍圖閣學士卒謚簡肅

姚恪淳熙中以武翼大夫知真州政平訟清奸盜遁伏撫民訓兵蓄財備禦以治最聞

趙師龍字舜臣儀封人淳熙中以朝散郎守真州篤實簡易不事聲華吏畏而民安

趙公豫字仲謙常熟人幼敏而善記背覆左氏春秋不謬一字登進士第紹熙中知真州居官廉正嘗言吾求為循吏不求為健吏

所著有奏議燕堂類彙數卷

葉維休東陽人淳熙中以迪功郎為真州教授宋制州得試士有貢院火於兵秋試率於學宮丁祭輒於佛寺維休力言其非尋改建貢院有改試院記

左昌詩番陽人淳熙中以朝散郎知真州奉法循理節用愛人建府庠繕溝壘訓習民戎夙夜殫力又開大橫河江舟艤船稱便焉韓挺蘄王孫紹興初以朝散大夫來知真州嘗修學藝講堂繪二禮之制於壁開禧間敵至直城羅拜廡下學宇得全者挺之功也錢佃字仲耕常熟人以進士為分水尉遷真州教授忠信誠篤根於天性臨政不求赫赫聲恒以字民為先朱子嘗亟稱之官至中奉大夫著有易解文集等書

吳洪字仲寬天台人慶元四年以朝請大夫知真州嘗開新河二十里舟行者利之湖軍營屋六百區庇戎卒以壯武備去之日民祠而祀之

薛紹字承之温州永嘉人乾道間登第慶元六年歷知真州政聲甚著時有女子流涕自言其祖為先朝諫臣不幸漂泊至此紹詢其家世良是亦為流涕資以金帛內子捐簪珥擇士人嫁之

劉宰字平國金壇人紹熙初進士慶元中調真州司法時詔下州責有出身見任人狀稱不係偽學不讀周朱等書方得考試宰喟然曰平生所學者何首可斷此狀不可得卒弗與遷太興令浙東幹官遂引去屢薦不起卒朝廷嘉其節謚文清著有漫堂集語錄行世

張頴樵李人嘉泰初以朝請郎守真州初州未有堰閘乾興間大將軍陶鑑始使州為木閘二以便漕事歲久輒腐至是頴易以石

後世石闢本此

林伯成福州長樂人淳熙間武舉開禧中以武毅大夫知真州創建陶冶築城五百餘丈鑿濠深廣之歷考圖志翼城之築自伯成始

方信孺字孚若興化軍人有雋才以父蔭補官開禧間以蕭山水赴召三使於金能以口舌折強敵累遷淮東轉運判官兼提刑知真州即北山壘水築石堤袤二十里人莫知其所為後金人薄城守將決水壘退敵城以獲全

潘友文字文叔東陽人嘉定初以承議郎知真州時兵火後民露處饑饉相望友文開賑民局給餼糧惠藥餌全活者三萬戶修築翼城創屋其上開濠浚渠民有所恃建瑞芝清邊堂百廢具舉三年除福建提舉民立祠祀焉

慎獨嘉定間知真州甃圯城築兩石壩以護並江居民益浚一濠築陳公塘堤有警則決以阻禦真民賴之

豐有俊字宅之四明人進士慷慨有大志嘉定中知真州時旱甚有俊計口賑恤之置贍軍莊創防城庫增置陶冶為城守計又立小學於學宮政尚節愛民德之為立祠

袁申儒嘉定中以朝請即將作監丞知真州上便宜十二事作翼城置營運庫開茆家山塘築堤置牖堰匯諸水溉城以防敵是年金兵果至迫翼城疑不敢前遂遁去

吳機字子發天台人嘉定中以運判兼知真州至則創閱武亭設抵當庫鑿橫河浚重濠道塘水置堰牖匝濠三隅分兵五等補尺籍備械器畫城捍禦部分井然時翼城未就工費尤鉅前守數十

年經畫至是始成初漕運悉用客艘機慮其擾民也捐官錢置舟數百民旅便之又建大成殿由禮亭於學修州志去之日民爲立祠

丁宗魏金壇人嘉定中進士以從政郎再令揚子縣兼義武兵民軍政時金人入境衆洶洶欲渡江以避宗魏謂守禦之臣當死封疆敵至而避孰爲之守不聽久之事定建同愛堂修州志二十卷累官朝奉大夫知廣德軍

上官渙酉字元之邵武人進士寶慶初以轉運判官權州事請改築翼城以衛城南之民節冗費覈羨財選叅佐三年乃成修社稷壇立常平倉贍軍濟民修車馬備器械凡守禦之需皆具焉

史巖之字子尹鄞人進士寶慶中歷官知真州兼權運判金兵入州境巖之率衆捍之訖以無恐遷大理丞兼知揚州

邱岳字山甫常熟人端平三年知真州嚴重不妄發一語時蒙古將察罕攻真岳部分嚴明守具備豫敵兵薄城輒敗岳乘勝出戰胥浦橋以強弩射殺當先一人敵少却岳曰彼衆十倍於我不可力戰乃設伏城西敵至伏起殺其騎將復選勇士夜襲敵營焚其帳敵遂遁去凡四禦大敵未嘗少挫理宗御書忠實二字賜之後守揚州

杜庶字康侯邵武人儻有大略通宋典故善爲文習邊事淳祐中以父果廢補官權知真州州素缺備庶大修守禦積木殆十萬株遷司農丞知和州陞辭上言今天時不可幸地利不可恃人和不可保必求得諳練邊務之人而後可爲帝嘉納焉改知真州兼淮東提點刑獄後歷官至江西轉運副使

孫虎臣譙郡人景定中知真州屢敗元兵有功德祐初守泰州元

人來攻援軍不至城陷自殺

失夢炎字明叔蘇州人以祖蔭授將作郎咸淳中遷真州司法廉敏善鞫獄初軍餉所收綱米每病惡濕以綱人有餽送事例故也炎斥去之積病頓除

苗再成德祐元年知真州元阿朮來攻再成與趙孟錦大戰於老鸛嘴二年丞相文天祥為元所拘夜與客杜游等亡入真州再成出迎喜且泣天祥問計欲說李庭芝以淮東軍攻灣頭揚子橋夏貴以淮西軍入金陵而已以舟師直擣鎮江同日大舉天祥稱善即致書庭芝結約庭芝得書疑天祥為元人說降並疑再成再成不得已因給天祥出城計遣之去元人以帝北行過瓜洲再成謀奪駕不果頃之阿朮來攻城再成與趙孟錦禦之孟錦戰死城陷再成不屈被害

趙孟錦宋宗室少不羈遊淮以軍功為將佐北兵攻真州每戰輒為士卒先州守苗再成倚以為重北兵重艦駐江上孟錦乘大霧襲之俄頃霧霽日高北人見其兵少逐之登舟失足墮水身荷重甲溺死

馮都統失名德祐二年夏五月都統自真州率兵二千舟百艘襲阿朮於瓜洲元遣其將昔里罕阿塔赤迎戰大敗至珠金沙犄角失都統力窮赴水死

元張震字威亨清苑人習國字中選泰定元年歷陞朝列大夫知真州州介江淮百貨叢委俗尚且儉行旅苦之震為誅其尤者又新廟學鑄祭器繕陂塘鞫冤獄多異政士民感畏焉震性至孝奔母喪悲動行路即告老加中順大夫致仕

王德甫字體仁句容人以儒行任真州判公正有為擢知州事元

季飄然歸隱明初累召弗起力田築室種菊自娛號曰菊叟

趙璉字伯器宏偉孫也至治初登進士歷官參議中書省事是時河南兵起荆湖皆下兩淮騷動元乃析河南地立淮南江北行省於揚州以璉參知政事分省鎮淮安乃移鎮真州會張士誠起海濱陷泰州行省命高郵守李齊撫之士誠就撫因移璉鎮泰州璉趣士誠治戈船赴濠泗士誠不肯知璉無備遂復乘夜縱火登城璉即拔刀騎馬出鬪市衢士誠圍之邀至其船璉馳騎欲戰士誠以槩撞璉墜地欲舁璉登其舟璉瞋目罵之遂死其僕揚兒以身蔽璉亦死亂定州民收其屍歸殯真州事聞賻鈔三百錠仍官其子錡

明周之貴洪武初真州始下即命來涖州事民賴以安

賈彥良定遠人洪武二年知儀徵時師旅之後民俱流亡彥良招

撫復業建學校創署廨庶政修舉廉明有聲

謝文隆四川巴人洪武十三年知儀徵賦役均平撫民有方修葺濟院以庇孤獨壇廟解宇多所建葺

康彥民吉安泰和人舉進士洪武二十九年知儀徵至則曰教養

令事也弗務此而織是圖其何能政於是崇學勵賢士習丕變邑

始有登科第者又修葺社倉平役弛利不以察察為治時稱廉靜

李義字仕忠其先沛人元末兵起父榮為勝國帥洪武初以彭城

歸附從徐達守徐州收東昌棣州屢立戰功歷封昭信校尉榮老

詔以義嗣千戶累遷儀徵衛指揮僉事永樂初陞都指揮僉事守

真州旋以本官為四川都司六年勅從黔國公征安南至生厥江

大安梅口與賊大戰力竭而死子敬嗣其官遷為重慶衛指揮同

知

譚清永樂元年翊贊王師統兵至境即命以都督守備儀徵至則
招集逋亡撫綏疲卒增修學校化荒墟為沃壤聲績流播

孫禮滄州人正統十三年知儀徵勤政恤民剗煩治劇時有能聲
論者謂孫之善政與賈康並遷廬州府通判

王漢贛州人景泰四年知縣事在縣七載政尚和平歲旱禱雨不
應迺詣城隍神告曰令之不德責與神等今旱魃為虐歲且不登
令或不職甘罹其殃下民罔知胡足深罪遂以身與城隍神像同
鎖項焉以示罰俄而大雨如注水平地尺民獲有秋

趙憲冀州新河人成化四年知縣事政尚簡朴崇教恤民出必跨
馬而不輿曰遵王制以示先也諸生有甚貧者不厭資給仍訓勵
之俾勉於學九載當代去民皆遮留巡撫疏聞詔加正六品俸復
三載迺致政歸後南行過真民無少長咸往拜留半載乃還其得

民如此

都勝武定人成化五年由兵部薦以都指揮任儀徵不以家累白
隨布袍菜羹澹然如寒士官屬憚之練武之暇折節禮士尤好讀
書督學御史戴珊稱其有儒將風恭謹孝義出於天性政尚嚴肅
人莫敢干以私

宋綱成化十年以南京金吾後衛指揮任儀徵營性操剛潔涖政
嚴恪以興利革弊為己任軍民所未便者輒形諸奏牘雖銜命當
道或不相善必抗疏論之無所遜避時人多悚服焉

高梁浙人成化二十年知儀徵寬厚愛人不恃督察無能聲而有
惠政居數年職修事舉獄訟幾息及致政歸民猶思慕

彭道字貴三吉水人貢士成化間教諭儀徵秉教嚴諸生課誦齋
舍每至夜分覘其勤惰諸生有寐者詰朝責之以是共奮於學時

黃瓚方弱冠刻苦學問道言之督學獎異之藻識師範卓然稱賢居九載改吳縣去

徐淮字必東高唐武城人進士出身弘治十三年以治幹才自饒陽令調真至則闢異教汰奢靡辨貴賤定等威令行禁止庭無宿訟吏民奉之如神淮身先以樸定婚喪式禁民戎冠華裳釋道有私入民家及設齋醮者輒重治民貧不能娶者即為召女以所蓄雞酒送歸夫家徙娼優之居毋與民雜處令戶懸蘆簾以別之由是市無遊手民歸本業豪貴斂戢淮尤留心學校凡朔望廟謁畢即坐明倫堂與諸生說經決疑證誤移日無他言以籌識諸生名置衙中日令胥持籌造學召諸生來課藝有不至者收以夏楚是時庠序齋廡之間絃誦聲盈耳蓋諸生奉淮儼然一嚴師也淮為人剛毅有大節不避權倖真境故多中官出入索夫價為民害淮

屢裁抑之璫不得逞忿愬於朝被逮邑中皆奔泣以送至京下獄科道交章辨救得謫貴州按察司經歷歷升僉事

呂夔字祖邦永豐人進士弘治十六年任儀真分司時江淮旱歲大饑夔乃約已省事令貧民各得轉移力食勿繩以類官不籍記公無勾稽自為請賑所活甚眾又創官河義塚分飭街坊日以殍告昇瘞之又推行於瓜洲鎮為人修雅喜吟咏涖真三年著有草堂餘興集

李文瀚字內英河曲人舉人正德十二年知真政尚平恕嘗刻農書圖纂教民樹藝武宗南巡駐蹕數日供帳萬億文瀚盡瘁經理境內賴以弗擾入覲左右有導以貸富民財者厲聲叱之惟載圖牒以往以廉擢知商州

周寵字君錫浙江臨海人嘉靖丁亥知真嚴肅有風裁祛里胥宿

傳志卷十九
弊清鹽商包索地租代補歲辦之賦審丁夫立九則一以宜民為本又毀淫祠正祀典範寺觀銅像為文廟祭器治行著聞當道交薦擢監察御史

王皞字天民安福人舉人嘉靖六年知真性樸茂以儉率下諸淫費厲民一切斥罷又闢親民館講學其間或集童子習所輯四禮俗幾無訟會當道有讐其廉者作威收之皞憤抗疏引疾聲振一時頃以治行徵客死京邸

師儒山西蒲州人舉人嘉靖乙卯由灤城令調知儀徵適倭寇淮揚儒晝夜繕禦日在城櫓間與士卒同臥處倭分道抄掠且薄城下會盛暑大雨江溢城門水深三尺士民奔集城外者數萬人儒提劍立水中開門悉入之申明斥堠寇莫敢犯卒以性濶略為人中傷時論惜之

張鳴瑞瀘州人進士嘉靖戊午自穎上調知儀徵清恪不喜繁縟政理平恕御民一以保愛為本每與諸生立會課藝評品精當六類歸嚮者甚多三年擢兵科給事中去

申嘉瑞字叔獻河南葉縣人舉人嘉靖四十三年至邑政尚嚴肅清操凜然一時奸猾震悚又周知民間利弊力為釐剔開書院刊縣志善政多端至今賴焉民祠祀之

孫臯齊河人貢士嘉靖間司訓於真守道自愛義不苟取士有貧者則卻餽以贈之

湯慶嘉靖九年以邳州指揮任儀徵為人果敢善騎射知兵尤長於弭盜一時姦宄屏跡

盧相嘉靖間以處州指揮任儀徵知將略善養士年少性直遂人忌其才

唐邦佐字中廓金華蘭谿人隆慶元年進士知如臯縣以才能調知儀徵爾時歲賦民間架錢十萬七千及造舟築堤費苦不勝佐以官稅之羨代之舟堤均之各邑民困以蘇政暇雅喜課士士多獲雋者明敏善斷疑獄中都婦誣富人殺其夫坐辟臺使以屬佐訊佐閱爰書怒曰此婦實殺之夫脇骨三折當暴死安能行五里許而歸婦具服鄰郡婆訐其叔侵其產萬金佐置叔盜籍中戚里咸來言某實非盜富得之寡嫂產耳佐笑以其嫂牒示之因叩頭請罪嘗避雨僧寺雷電繞之遂留宿夜夢被髮血淋漓者走至樹下沒詰朝集寺僧伐樹得死男子則夫與婦行過寺寺僧搥死夫瘞之婦尚在於是誅僧而赭其居又嘗雞鳴出郭門見婦人散髮溺水者決水得死婦則悍妻妒妾殺而沈之坐如律時稱神君治行為江北最壘書賜金褒勞以不能阿邑權貴僅擢刑部後與同

舍郎謀劾江陵相奪情宵人中以計典去

張世則山東諸城人進士萬歷初為吏科都給事以直言敢諫忌於時外轉參議陞辭日疏叅冢宰謫儀徵萬歷十一年至縣不住官衙不理民事朝夕與諸生課藝論文是科鄉薦有人未幾擢江西贛州府判尋陞主事官至憲副

王化山東長山人舉人萬歷三年諭儀徵學委署縣事嚴潔有操一毫不取時有引鹽燒毀例應買補諸商求縣轉請餽三千金不受廉聲大著擢南國子監助教行李蕭然卒於官士林慕之

王伉字韋軒潼川州人進士萬歷三十七年以蒙城令考最調知儀徵直俗侈富邑多巨猾奸黠者夤緣充役專為羅織罹其毒輒破家伉入境褰帷指名捕之立榜死肆諸市一時奸人屏息尤善斷疑獄人疑其神江北四郡民凡以冤滯愬兩臺者悉求就伉理

無不得直而去四十四年入覲擢吏部驗封司主事後以開府六
詔終邑民久而不忘立祠祀之

牛翀元高平人進士性真實政尚嚴明莅任數載令出惟行時有
三王之國皆繇過真供億繁難元悉心料理事肅給而民不擾入
覲留部考選北道御史邑人為立祠

王燾崑山人舉人崇禎三年任義徵教諭清介寡合端廉樹範寒
士有餽者却之所交窮乏者捐俸給之舉鄉飲賓席特嚴師道卓
然程知山西解州復除湖南隨州流賊破城死節撫按題卹

姜塚字如農山東萊陽人崇禎辛未進士為儀徵令清介自持不
畏強禦邑故製鹽地御史委之掣諸商或以羨例進輒斥去是時
軍需旁午塚獨留心撫字流寇震鄰守具咄嗟立辦賊遊騎已至
鐘家集聞有備解去歲乙亥開新城運河塚力言弗便主者不聽

後吳無成河使者得罪並累塚久不得調塚不自明十年始以治
績考最擢禮科給事中上疏論柄相蠹國忤上意下詔獄廷杖
百謫戍宣城甲申後隱棲吳門者三十年疾篤誠子曰必葬我宣
城無違君命卒邑人為立祠

江起鰲文登人崇禎五年以吏員為儀徵丞操潔有儒風而敏幹
嚴肅為僚長所重陞鳳陽留守右衛經歷聞報日適流寇震鄰士
民乞留城守上官委以督軍拮据年餘勞績茂著事平乃去

馬從謙杭州人崇禎八年以歲貢為儀徵丞博雅能詩文清白自
愛半載方有功於敵臺忽以內艱去士民惜之

鄭瑜字瑯軒山東諸城人庚辰進士為真令初至邑時事多艱頗
極拮据民多逃亡加意撫存流寇日急而城久不修瑜經理增築
之後鎮兵橫恣賴以有守未幾遷南臺御史

王道行字冲宇遼東人貢士崇禎十七年涖任時黃得功開藩邑中兵民相安道行於民尤無擾凡有供億蔬米悉以市價備給殘邑遺黎頌廉惠焉

黃得功字虎山開元衛人起行伍封靖南侯勇戰冠一時流賊遇之則走崇禎末開闔儀徵高傑在揚州屢以兵來爭得功迎鬪傑輒遁去是時傑兵肆掠獨不敢入儀徵境人賴以安每戰必先飲酒數升大呼裂眦入重圍如無人戰罷歸猶揮刀不釋手即親從無敢近御卒嚴居民皆安堵待士尤有禮每朔望謁聖畢諸生或請講書笑謝曰武夫何知惟知馬上事耳左夢庚叛移蕪湖以逼之金陵不守得功志在連兵方臨陣逆友誘與語箭貫其喉自刎死葬青山

本衛世職先後死事者七人胡恕本衛右所正千戶永樂間從征交趾金勝高麗人右所副千戶土滿子宣德間襲父職從征交趾皆歿於陣曾琦左所副千戶宣德間奉調北征陣亡王綱本衛左所百戶敬子正統間襲父職北征有功陞左所副千戶尋征廣陣亡吳臣任臣畢獻皆本衛百戶正德間為巡江官時盜舟泊青山沿江劫掠吳臣率水營兵奮勇襲之不克而死又鹽徒橫行江上官兵莫能擒勦任臣與畢獻往捕同戰死焉

國朝劉宗孟字與瞻遼東人貢士順治六年知儀徵清峻愛民不受請謁無敢以私干者初舟師入楚道必經邑供應無虛日前令恇蒞民弗堪孟父本勲舊多與將軍左右為親識每父子騎而犒師陳說邑民疾苦供億簡當牽挽不勞戰艦無停逗民有犯者扑之徵發外惟靜臥民安之以內艱歸至今思之

牟文龍字紀伯錦州人順治九年為儀徵令機警有幹才善於催

徵民無逋逃者每視學喜集諸生語為邑學請增士額得如大縣
數多士德之是時征戍往來多索牽舟役夫應付有方民賴以不
憊十六年海氛至鎮江儀民驚竄告急請援未至遂挂議去後補
福建閩縣令

邱時中字拙叟山東濟寧州人進士順治十七年知邑事明察執
法邑無冤民嘗夜眠未熟恍見一人持粉牌跪上有十分處人四
字大驚起索火視之不見惟聞血腥撲鼻時案牘有一殺人事悟
曰此十八刀也詰旦訊之被殺者果賊解如其數冤遂白又一日
閱公牘微哂曰天下至公之事往往遂成至私之事時以為格言
以內艱歸後補遂溪令

童欽承字在公會稽人進士初知新陽順治末補任儀徵端謹不
妄言笑初平繩吏嚴已而寬平惟期與民休息訟者自和講即不
問已亥後有大案廉得其情多所釋免邑人感之廉惠有聲遷內
府中書舍人

汪時泰字叔菴漢陽人辛丑進士明敏廉介勤於吏事遇十以禮
其弗類者亦不獲望顏色京口王之瑚逋糧召詰之云貧不能措
試以舉子業大加稱賞曰子不久處此矣為輸其逋是秋王果獲
雋尋成進士邑有落地稅每至秋多不取曰吾經費已足不敢以
羨餘進也後以內艱去民相率而送有隕涕者

論曰子所論次宦蹟多詳於守令師儒丞簿尉之官而略於唐宋
以來轉運使判者非敢遽沒其蹟也蓋官以江淮淮南為稱非僅
如州縣職厥功著者國史書之維揚郡志記之可得而略也若劉
綜薛奎向子諲諸公則以澤在真耳寧謂其獨出諸公右耶真昔
為州則有州之官今為縣則有縣之官是詳所當詳者也然蹟有

不侔矣。傳亦有不備矣。其姓名則具表之職官。至於桓桓介冑之選。當承平無事時。有雍容捍衛之勞。而有事之秋。迺能奮於陣戰。委身鋒鏑而死。此與為民牧而著功德於一方者。要當為不泯爾。故不復別載焉。

贊曰。宦於真者。真民所賴。或頌神君。或稱茂宰。為士育才。為民祛害。偃草施風。茂棠生愛。績著一時。名存百代。

儀徵志卷第十九

儀徵志卷第二十

列傳二

人物

忠節

廉介

孝友

人物

宋孫錫字昌齡。其先江都人。隨父再榮遷家於吳。登天聖二年。進士授巢縣主簿。部使者及兩制以御札舉者十餘人。改鎮江軍節度。推官知仁和縣。籍取兇惡戒之不悛。必按法而治。其餘一以仁恕。父喪服除。充國子監直講。遷薊王宮伴。讀教導有法。改著作郎。又為國子監丞。召試集賢校理。同知太常禮院判吏部南曹。為開封府推官。後以事謫。出會明堂恩。詔還。同判尚書刑部。奏赦逮捕親屬繫獄者凡百二十三人。復為開封推官。當隨尹奏事。仁宗問大辟幾何。錫因奏開封當改者數事。上然之。時有貴戚女使奏讞。即以付錫。曰。此人平恕可任也。以判官誤決道士事。罷知太平州。

錫不辨未幾上悟復以提點淮南路刑獄活大辟十三人考課為天下第一名為三司戶部判官求知宣州至則與五縣令約州所下書有不便者封還使縣得自為政而州無事尋知舒州發常平廣惠倉以活陳許穎蔡流人及歸計口量遠近給食遣之初提點官恐聚流人為盜又惜費倉穀數牒止錫屬佐亦爭言不可錫行之自若人以是尤感焉比代去州人閤城門留之官至尚書度支郎以老致仕神宗即位遷司封賜金紫卒年七十八錫忠厚正直生平未嘗言利老而貧不悔也天下稱其長者有文集二十卷行世長子湊六廟齋郎次子澄寶應簿

孫洙字巨源錫第四子少竒邁十九擢進士第補秀州法曹母喪服除調於潛令舉應制科進策五十篇指陳政體明白刻切韓琦讀之太息曰今之賈誼也用陳襄薦稍遷至祠部歷館閣校勘與

蘇軾蘇轍李邦直同在薦列再遷集賢校理知太常禮院治平中求言洙疏時弊要務十七事後多施行兼史館檢討同知諫院乞增諫員以廣言路王安石主新法多逐諫官御史洙乃力求補外知海州免役法行常平使者欲加斂緡錢以取贏為功洙力爭之方春旱發運使調民濬漕渠以通鹽舸洙持之不下三上奏乞止其役旱蝗禱于海山徹奠大雨蝗赴海死尋幹當三班院三班員功罪籍不明洙革其甚者八事著為令同修起居注進知制誥建言百官遷敘不宜用一定之辭詔自今封贈補蔭每大體一易他皆隨等撰定元豐初兼直學士院澶州河平作靈津廟詔洙為碑記神宗嘉其文遷翰林院學士月餘得疾帝數遣中使尚醫勞問將用為叅知政事竟卒年四十九帝臨朝嗟歎賜賻錢五十萬洙博聞強識明練典故文詞典贍有西漢風

沈季長字道源貴池簿播季子也舉治平進士第始為越州司法叅軍歷集賢校理以王安石妹壻得與學官之選與曾肇等夜在安石齋授口義旦至太學講之又與陸佃釋詩義以進安石自為商定熙寧間仍以集賢校理陪伴送北使乃自換錄其事久之歷修起居注崇政殿說書元豐初帝御邇英殿季長進講周禮稱旨一日帝語及前代君臣因曰漢武帝學神仙不死之術卿曉其意否此乃貪生以固位故其晚年舉措謬戾禍貽骨肉幾覆宗社且人主固位其禍猶爾為人臣而固位其患亦何所不至朕每患天下之士能輕爵祿者少季長曰士而輕爵祿為士言之則可為國言之非福也人主有尊德樂道之心士皆以不得爵祿為恥寧輕爵祿者哉至于言違諫拂士有去志始以爵祿為輕帝曰知言後官至國子監直講著書四種行世

張汝賢字祖禹世為廬陵人徙居真州第進士初調贛縣主簿以御史中丞薦除監察御史善為章奏語約而意至元豐間除侍御史數言人所難言未幾以論尚書左丞王安禮與之俱罷元祐初復為吏部郎佐選素稱繁劇汝賢迎事立決吏不敢欺後使閩越奏弛茶鹽增價得減十之八又以赦令蠲民所負官錢米五十餘萬閩人德之淮南饑充江淮等路制置發運副使命以發廩汝賢遂請下諸路轉運司會計自熙寧以前一歲出入及常供泛用之數并叅考熙寧經費且條畫因革所宜要在省不急之用量入為出則無不足之憂帝從之歲餘以左司郎中召還有疾道卒張汝明字舜文汝賢弟也少有聲太學司業黃隱欲以子妻之汝明先約以無為華飾協力承親然後受室元祐中登進士第歷簿丞叅軍滯州縣者二十年未嘗一語干進至大觀中召寘學制乃

充檢閱文字預考貢士不悅者誣以背王氏學詔究之徽宗覽其去取錄曰考校盡心寧復有此特改擢監察御史嘗攝殿中侍御史即日劾蔡京招恩市權且謂京卞親兄弟京中書執政卞樞密秉兵文武兩權盡出其門一旦不虞措社稷何地帝獎其直京憚之徙司門員外郎出通判寧化軍謫監壽州麻步塲遇赦簽書漢陽判官晚知岳州卒于官年五十四汝明事親孝母病疽更數醫不効汝明刺血調藥傅之而愈其學精研象數貫穿經史百家所著見藝文志

吳敏字元中妙齡秀發大觀二年試辟雍首選蔡京喜其文欲妻以女敏辭因擢浙東學事司幹官未幾除校書郎京復薦之充館職除右司郎官升中書舍人同修國史記注西掖時年二十七一時歆豔遷給事中後以言事落職歸宣和五年復召還舊職兼直

禁林鄭居中方秉政以敏數言其失銜之坐失駁罷出提舉南京重慶宮久之復為給事中權直學士院兼侍講薦趙鼎為開封士曹時徽宗將內禪定計東幸命李忱先出守金陵敏詣都堂言曰朝廷何便為棄京師計耶此命若行雖死不奉詔忱遂罷行七年冬太子除開封尹帝東幸之意益堅李綱謂敏曰建牧之意豈非欲委太子留守乎今敵勢猖獗恐非傳太子以位不可敏曰監國可乎綱曰肅宗靈武之事可鑒也敏翌日入對即具以綱言白帝且薦綱可用帝遂召綱入議綱刺背血上疏請假太子位號以守宗社帝意遂決于是命草詔傳位太子欽宗既立拜敏光祿大夫少宰兼中書侍郎敏辭詔以通議大夫就職敏請三省密院并依祖宗法又請褒贈司馬光范純仁張商英罷元祐學術之禁以示好惡又奏唐李德裕言宰相無能可亟罷必不可使政令不歸中

書又奏蘇軾言祖宗重臺諫乃是察大臣之為奸者蓋國朝之制
似乎內重則天下之權萃于宰相故以臺諫察之臣雖任相事願
開言路以通下情又言陛下當法藝祖以武定天下然須持久以
平大難自蔡京王黼壞文高侏童貫壞武紀綱大亂釀禍已久唯
聖心克寬無欲速則大業可成又言漢文帝用醇厚長者天下富
安武帝用材能天下多事本朝仁宗恭儉寬仁所用皆厚重日計
不足歲計有餘神宗勵精政事王安石始用才能急功利風俗以
是壞要之藝祖仁宗皆陛下所當法也又言為天下者當視為一
物近年以來有御錢有朝廷錢有有司錢人材亦然有親擢有大
臣薦引一天下而自為分別如此此其極至於君臣相疑而政令
改行臣但願陛下視天下為一則事可成帝皆嘉納又上疏言王
安石廢春秋非是願下明詔立春秋學官以貢舉取士共講聖人

之遺經以輔世教從之敏屢建議寢與太宰徐處仁不合後因許
翰事紛爭帝前中丞李回論之翰與處仁俱罷敏乃以觀文殿大
學士領醴泉觀使未幾出知外州後以主和割地之罪復被竄逐
紹興初用薦舉廣西湖南安撫使卒於官

沈度字公雅播曾孫也紹興間令餘干政有善績以考功郎中除
直秘閣知平江府乾道二年召赴行在上曰甲申之歲委卿守吳
門治行昭著可謂得人又詢吳中歲事度奏臣初到郡水歉艱食
荷陛下捐馬料以萬餘石以賑之全活甚衆上曰正賴良守措置
漢宣帝所謂與我共理者其惟良二千石乎即以爲中書門下省
檢正諸房公事四年又以直龍圖閣知建寧府是時朱子在崇安
爲度屬吏創立社倉均糴度以錢六萬緡助役倉成民賴之朱子
記其事又知臨安府仕終兵部尚書

劉大中字立道揚子人父湜政和間進士分教處州不樂仕進自號拙堂居士大中經明行修大觀中賜上舍出身時修史極天下之選得四人倪若川汪藻徐師仁而大中與焉紹興三年權監察御史宣諭江南東西路斥姦惡推善類不避權勢歲省泉司官吏費十二萬緡四年遷右司諫言大禮賞格戶部迫取物帛為害詔為展限一月七年以兵部侍郎知處州戢吏撫民所部肅然未幾召遷八年除禮部尚書參知政事遂奏疏中原陷沒東南民於兵火存者十無二三奸臣虐用誅求過數最為疾苦以致愚民怨憤殺子溺女乞自今守令滿日具以生齒增減為殿最首議建儲語尤懇切高宗為之感悟賜以御書陸機文賦是年冬以與趙鼎見合不附和議秦檜使御史蕭振劾罷之遂以資政殿學士大中大夫再知處州以疾乞閒卒於處葬白雲山括蒼新志自宣和以後賢守二人大中居其一

鍾離松字其紹真州人紹興十八年登進士第乾道間以朝請郎知興化軍事為人退然自下而治事之勤秉燭繼日馭吏牧民咸得其善嘗奏請蠲租詔盡除之真士之為守牧者松首稱良焉明顧謙字仲謙世為真著姓謙生五歲舉止凝重事母至孝洪武庚辰登進士第授行人出使得專對體尋拜監察御史按治南詔時兵伍之制未成上以命謙謙至編立衛所尺籍伍符釐然一清會吳橋賊嘯聚猖獗謙奏誅之按部宣朝廷德意開說衙司給以冠服使知向化其酋有以金繡雜物為餽者歸皆奏聞文皇以京師流民輻輳恐無告失所為設飯堂市中多備藥物使謙主其事謙曲為嫗煦全活者甚眾上嘉之洪熙初擢通政司叅議未幾以同列連坐降本司知事至宣德間下詔求賢始以薦遷江南按察

僉事再調浙江擊奸戢貪舉賢勸士並有仁聲以老病乞歸卒年六十七所著有魯齋稿愛梅軒稿遺芳集

彭真字幼實生而穎秀治尚書學雅志經術洪武間領鄉薦入太學多友名流所得益進永樂癸未詔遴國子生四人輔贊親王真首被選授靖江王府審理正王甚重之居十八年改知大興縣縣隸京師百司所需艱於酬應真涖官數月沉滯叢沓咸見埋釋會建宮殿擢工部營繕司遷戶部郎中頃之乞歸不報懇乞至再乃得歸真為人篤實言論從容歸而結廬藝圃飲酒賦詩以終士論愜焉

黃惟正字用中其先汴人明初徙居儀徵永樂甲申進士仕為戶科給事中遇事敢言舉劾無所避嘗兩論冢宰蹇義直聲振於時義銜之會晉府長史缺上勅史部推能幹正大官補之義疏惟正

敬憚焉惟正性剛毅體幹魁梧美髭秀目時方以公輔期之為義中傷怏怏以卒年四十七

柳琰字邦用少雋拔洽聞強識成化二年進士授戶部主事監收密雲軍儲請託不行進承德郎監督淮安糧餉中官不得恣搆之左遷通判南陽府以憂歸服闋改判廣平稍遷吉安府同知言俗健訟號難治琰按部擊奸右良興學能聲甚著時郡有水患琰擇篙工集艇以渡民所活甚眾撫按上其事特詔旌之贛州民嘯聚為亂巡撫李昂討之時軍中有疫琰選醫療治得不蔓染又江西民逋負歲幣藩臬命琰齎金赴浙織辦餘千金歸悉還之官時稱其廉擢知嘉興府祛蠹戢頹與利均役修海塘築壇壝繕城郭恤孤獨百務具舉初里胥侵盜官租歲為民患琰至廉得其人悉

抵於法豪猾斂迹由是釋冤囚數百人琰性簡淡客至清談啜茗而已博學能詩官戶部時與長沙李東陽天台謝鐸輩倡和所著有東津詩集卒於官年五十七士民為置棺以斂厝無餘資

黃瓚字公獻世為儀徵人貌古性直自少篤行好學成化二十年進士授南京戶部主事進員外郎督湖廣諸州軍餉父喪服闋遷本部江西司郎中雙清事集同官憚之出為四川布政司右參議督松潘諸路邊儲時番人為寇瓚至備示朝廷威德禍福順逆之勢以懾番心遂安置土官而諸洞帖然尋以母喪歸岷戍番婦皆抱子女號送境上服除起四川左參議正德初藍鄙諸盜起巡撫林俊何以為勛瓚分守保寧深入通巴解散賊黨遷浙江右參政多為惠績擢江西右布政使時寧濠不法諸司多為所制瓚獨不撓轉湖廣左布政使吏部疏天下外官治行五人瓚第一賜官

禮部陞應天府尹晉巡撫山東時山東寇亂用兵之後郡縣倉殘成風瓚乃身示儉朴節用愛人勤民瘼絀官邪禁崇欽藩臬大僚無敢有燕樂者憲綱丕振汙吏至解印綬潛去歲儉嘗命所司以稷充餼廩黃河決城武請遷縣安民朝議裁武定兵道乞留備要害劾舉庶官貪廉臧否不私裁臨清關中官溢稅設伍保法弭響馬盜修武備繕城郭修省志有廢悉整歲終畫圖以獻武宗嘉其勞特遣中使齎金帶一品服賜之并勅諭倚任眷念之意瓚以無功辭入為南京兵部右侍郎江彬扈從南巡值其生日部寺俱賀瓚與侍郎何孟春獨不往嘉靖初致仕卒諭祭營華如例瓚自奉菲約敝衣糲食如寒士人稱其清似楊綰云所著有雪洲文集若干卷

景暘字伯時儀徵人少穎敏隨父官廣州布政劉大夏見其文大

賞異之正德戊辰進士廷試第二授翰林院編修劉瑾方橫凌轢諸儒臣見暘獨嚴禮暘亦不少降在經筵必先夕齋沐曰咫尺天顏不敢不敬也甲戌會試為同考官遷國子監司業與諸生講解不憚寒暑三年以母老乞南改左春坊右中允管南京國子監司業時士子競請託暘禁止之不改繩以法士習一變暘至性孝友家庭藹然姊蚤寡迎與母居視其子女無異己子友人張貢欲為子聘其姊女未成而貢死暘曰聘即未行既心許之忍負乎召其子妻之暘為詩古文雅麗有聲與鄉人蔣山卿趙鶴朱應登稱江北四才子所著有前溪集若干卷前溪暘別號也

王大用字時行正德戊辰進士授工部主事官臨清聞時流賊剽掠趨清源大用與兵道閉城獨留帑城外官舍以安民心乃督壯勇與戰賊解去轉刑部員外郎擢廣東兵備命事會樂昌高快馬

流劫湖南詔大用合兵討獲有功又清遠徭熾帥所部渡港江旗坑諸寨獲其酋又移池水攻黃籐峽黃花洞諸巢獲賊都督凡督征五載巡撫蕭紳疏其才陞本省兵備副使民立兩生祠祀之尋陞山西叅政遷廣東右布政未幾推都御史巡撫順天又改巡撫大同至則破巨盜劉善斬之傳首京師疏備邊四事一曰罷按使二曰變糴賣三曰革守備四曰減哨探報可初按臣張祿因與爭禮不合至是嗾給事秦鰲論之大用上疏乞休不允仍以整飭薊州兵備兼巡撫順天僅歲大饑奏給銀米數萬循行賑濟時朵顏三衛詐貢大用單騎入城調兵拒險伏所部為左右翼犄之朵顏謀洩宵遁復諭其酋長令獻黑谷關地暨太平塞五百餘里與飲盟去兵部會議防勦事宜大用復上三事曰重賞罰酌律例覈功次上皆納之陞右都御史入掌院事張祿復論大用生事構怨坐

免後以大宗伯霍韜薦復命巡撫四川時獲白兔不表聞而地震水旱請修省蠲租不置陞南京刑部右侍郎候代間會白草番變攻破平番堡給事中扈永通罪以失事基禍坐還籍候勘乃致仕卒生平所著有書經指略四書道一編易經安玩錄及聖學一貫圖說子邦圻具先後勲伐疏請卹典時相嚴嵩子世蕃竊弄威福諸請恩者非入千金屏不奏邦圻疏上嵩語蕃曰王時行一世偉人數著戰功家甚窶爾母以恒調困其兒也乃悉如所請

陳輔字汝翼有厚德篤事後母尊師信友睦於宗族為文典實無浮華正德甲戌進士授工部主事督徐州洪事宿蠹盡祛戊寅以疾歸里起改南京刑部主事治庶獄多所平反人謂不冤進員外郎擢廣西按察司僉事按部蒼梧道風裁凜然雅為督撫所重俄以宿疾觸瘴癘卒於官

蔣山卿字子雲家世儀徵素貧窶八歲時黃司馬瓚見之曰此子也才遂以女妻之正德甲戌進士初授工部主事己卯武宗南狩與同官林大輅何遵伏闕上疏諫曰昔太康遊畋不返夏德以微昭王南征不復周道遂衰逸遊之戒聖王所謹今皇上北臨宣代西幸榆林廢宗廟之禮曠定省之儀且今宗藩無道方肆窺覲萬一禍生不測奈宗社何上震怒幾斃杖下謫南京前府都事嘉靖改元復官歷刑部郎中出知河南府改潯州再改南寧時討思田酋首岑猛卿被命督餉調度不置猛誅以功晉廣西叅政總督林富重其材方擬薦擢乃以讒言罷在南寧入覲上言思龍立縣不宜割屬田州導使携貳移思恩而建府治於荒田尤為失策又言兩廣總兵率用侯伯彼皆純袴子弟營求出鎮朕削無厭宜選謀勇將臣充其任又言廣西夷多民少右江如柳慶諸州縣左江如

桂林平樂諸州縣城池圯塞千里荒涼徭賊得以出沒其間宜行撫按閱視修築城池繕道途置傳舍爲一勞永逸之計其經略大槩如此及歸惟閉門獨居徜徉詩酒較讐文藝以卒所著有南泠休園等集孫方有志繼述擅長詞賦以明經司訓蕪陰有文譽王大化字元成正德癸酉領南畿解額登進士授高唐州知州州人競武少文大化至則首謁文廟修學宮與諸生講藝暇則問風俗省賦歛勸農桑察冤獄招集逋亡鋤剔強暴州用大治擢嘉興府同知去之日萬民遮道泣建祠以祀後十餘年高唐民道經其家見遺像猶涕洟數下其在嘉興政如高唐去時民泣送鐫碑作生祠祀之亦如高唐云擢工部員外郎奉勅分理漕渠尋遷刑部郎中決獄執法不徇請託行賄者忌之反爲所中遂外補以定知州乃嘆曰直道之不見容至此也今吾親老豈長能僕僕簿書間哉請以原官致仕歸後議起用竟以疾卒年四十有九大化早喪母事繼母盡禮待異母弟曲盡情誼服官廉潔歸里後囊無一錢有志撰述嘗纂宋遼金元四史未竟有高唐志北湄詩集及續史詳節數十卷

盛稔字伯豐方正廉介以經術著由恩薦中已卯舉人丙戌進士初授廷尉有明允聲擢計部主事權潯關以廉覈歷遷正郎出知山西平陽府時站銀編額三十六屬率多匱屈不前稔查庫積七萬八千餘金蠲代之以蘇民困三藩祿羨約數千金皆不納但識原封發之巡按使以其事聞得特旨紀錄擢東萊兵道值倭寇山左稔爲備甚嚴增陴固圉蓄硝黃萬餘石倭平遷井陘參政嚴勾稽增堡壘內控三關外禦九塞紆神京左臂憂有同年隸屬者嫉稔峻又怨請囑不遂構讒陷之例改調稔遂歸後以褒大閱前勩

得賜金綺於家咨部起用終堅臥不出十有九年惟杜門著書而已既歿二十餘年有寇攻東萊甚急賴稔所儲火藥退之得無恙丙子春奉旨追叙入萊郡名宦季子自今有文名以諸生應例授河南修武縣丞張大司馬伯鯨督師武昌延入幕府叅籌帷幄遇賊難死義

姜士望字宗林父起周稱篤行早世士望襁褓母陳氏育之幼以孝聞兄里望有目眚出入常肩負之萬歷丙辰成進士授中書舍人為相臣葉向高所知時兩廟覃恩凡誥軸餽遺皆却不受省中舊多藏書士望每搜羅編次曰此匪特副曹局典規實期佐國家文治識者聞而敬焉奉使冊德藩王以暑溽狃便裁禮士望力爭之秩滿當遷太宰左右有招致之者不往曰昔人恥為呈身御史我豈為私謁曹郎謝之歸養母喪服闋會吏部江北司缺補稽勳

司主事遷驗封謂人曰此要津實羶途也吾懼甚遂引疾代者例有酬峻拒之是時大璫魏忠賢方張士望獨以義自持不激不隨初璫黨崔呈秀巡按淮南士望以部下曾不一通門狀崔銜而搆之將中以禍卒不能由是返里清約端恪布袍蔬食無異諸生時卒年五十三

劉學詩字全言生有異質父大綱竒之望以遠大為諸生時即端言矩步以氣節自勵刻意為文槩矍先輩凡世俗紛華不足間其攻苦登甲午賢書屢蹶春官勉為祿養署清豐教以文學重於上官擢太原司理內艱服闋復除衢州折獄案無留牘時按君有門役新婚遇強暴無主名獄不能決下司理詩夢一舟張帆於柳上寤而曰楊鵬也請鵬於按君掠治之乃白風力益峻尋行取考選湖廣道監察御史抗直敢言一時朝著畏其清剛所傳疏稿俱關

切時政歷考明之乙榜官侍御者獨詩一人

李時開字蕢伯天啓辛酉恩選授蜀儀隴令地比苗洞俗獷悍難治徵輸尤艱開至以廉正取信於民積逋有六七載者勸之輸恐後修文廟課士子弁而許之雋者一人果雋隴八十年無籍禮部錄者得之以爲異由是撫按首薦將題補潼川州守會流賊五萬餘驟由漢中奔蜀抵儀隴儀隴故無城開率士民退保縣後山上七晝夜壘土石爲砦民賴以無竄山高無水凡六日粒皆絕但令取麥花與士民同茹得不死開猶靺鞨小帽身率勁民馳射賊中賊始少却開短小精悍時賊衆遙呼曰無犯小李云事平理官李良基按視隴無恙求賂焉開不應以囚有越獄者譖於巡按使劾之開檄囚囚還按使亦悔然疏已行矣罷歸舟車皆不能具時故儀徵令王伉家居濟之始還閉戶著書撰毛詩解意三百五篇隴

民繪開像祀之有歲事禱則立應

鄭元勛字超宗先歛人後家江都占儀徵籍崇禎癸未進士忤黨抱偉略好策天下事巡按總督交薦之以母老辭不赴甲申聞變練鄉勇爲保揚州計復貽書當道謂固江南宜守江北守江北當拒黃河議格不行各藩鎮挾兵游掠儀揚上下數百里民無完廬高傑尤剽悍難制會當分藩傑欲得揚州至揚民疑局關不得入傑怒將攻之人情洶洶莫知所措元勛曰傑非叛也且梟猛不可敵當開以大義乃往白巡撫黃家瑞即單騎入傑營說之傑已許罷兵休舍有兵備使者激傑怒因肆焚殺衆謂元勛實致之也俄而譁焉遂害元勛於市三日後有兵部職方之命而元勛已死閣部史可法白其冤請卹斬倡亂者三人所著有文娛等集若干卷

國朝鄭爲光字次嚴元勛兄子順治己亥進士選翰林院庶吉士改監察御史糾州縣加派稅糧請立循環法清剔揚州鈔關積弊及科舉廣額諸疏皆報可直聲震一時得疾卒於官

論曰真舊志人物斷自宋始余甚韙之謂前此出廣陵者非專屬也顧於宋首杜龍圖鎬而宋史鎬傳稱無錫人歐陽永叔謂鎬之孫祀世爲金陵人即嘉靖初張渠志亦云其實不可考則杜之先徒真無的據今不欲泛載惟載其史冊世系確有本末者起宋訖今得二十餘人或且少之夫其人如孫司封沈少傅及劉道立吳元中皆前史名臣嗣如黃蔣諸公或樹功於遠徼或馳譽於清時即名位不同要皆負天下之望一邑有此可謂美矣而德器學行才藝又各有獨至者有分編焉志之務詳不敢以割棄也生斯地者望古流連蔚然興起後來人物應倍多於古昔爾

贊曰芸芸之生浩無紀極山川孕靈獨鍾英杰顯者事功大者材德近采鄉評遠徵史牒企彼先民欽茲遺烈

忠節

宋沈攸字子直揚子人建炎三年賊邵青犯境攸子攝揚子簿乞以所糾土兵禦之賊勢張甚攸挺身拒敵北門死

唐璟字用章揚子東鄉人父霆紹興間嘗領鄉兵拒敵馬鞍山獲功補官開禧間金兵攻六合及儀徵將指淮揚璟以民兵總轄親率子弟及所部強壯斷橋填堰謀決陳公塘以拒之時塘隸轉運使擅決者罪且死衆欲請之官璟曰必待關白豈能及事乎乃決其水俾東與句城塘會接揚州城南西連儀徵南際運河北距岡隴平原曠野不日而成巨浸敵騎登焦家山望遂驚去州賴以免郡守以聞將命之官會疾不就後權和州倅金人屠城遇害事聞

贈官錄其子弟

明王鼎儀徵人為趙忠養子明初忠從征有功戰死池州鼎襲爵復姓王守太平陳友諒以重兵來犯城中兵少鼎與花雲竭力堅守友諒攻城三日不下引巨舟泊城西南士卒緣舟尾攀堞登城鼎罵賊不屈死追封太原郡侯立忠臣廟於太平命有司歲時致祭

倪可大字簡伯樸樹灣里人少有文名以歲貢司訓霍邱崇禎丁丑流寇東下急縣令黃日芳適考滿預請以城守屬可大可大慨然身任之賊圍城督民兵千餘逆戰三晝夜以奇計斬賊數百級賊初易可大儒生卒覩可大親鼓士戰驚且却尋窺邑中無火備可大守北門急以巨砲攻南門門破城陷殺縣丞張有俊縣令先逸去教諭史士林守南門勢急亦陰遁賊恨可大甚趨北門執之

於元帝宮可大嚼指血噴賊面罵不絕口遂被害其妻女別有傳舉家死義者十有一人賊退事聞贈國子監學錄霍人為立廟北門外有內子本初本嘉本純文學有聲季子本彝別有傳

吳明知字伯亮其先歛人以業離家儀徵性剛介不屈少從維揚趙時用受業趙成進士擢給諫抗論權貴十數疏多出卿手崇禎癸酉領鄉薦壬午授崇義令縣俗健訟卿至竟月無差票無一鞭笞但日具壺茗坐堂上洞重門聽訟者出入就質數語折之半載巡按御史以政簡刑清薦於朝會甲申變扼腕數日不食死長子允蛟次子允超皆邑庠生蛟隨任適往贛聞訃亦自經死

鄭為虹字天玉元勛弟元化子也癸未與元勛同登進士甲申流賊陷京師為虹聞報即傾產募義勇為捍禦鄉里計既謁選授浦城令日與民講忠孝練精銳邑大治尋擢御史巡按閩中扼仙霞

關大兵至不守從容就義死同殉難者有司直黃大鵬都督洪祖烈僕陳龍

王道淑字善長其先豐城人四世遷儀徵世有仕者道淑由泰昌元年恩貢授金華府經歷陞湖廣按察司經歷微官無可表見道淑安之每自謂吏隱廣州破以身殉焉其子棧瑞從之闔門俱死嗣絕櫬骨遂不返其臨難有詩曰舍生取義尋常事地北天南頃刻飛寄語真州李文若忠魂萬里定來歸文若其壻云詩為道淑手書以寄之者邑人猶時相傳誦

國朝劉欽隣字江屏其先江西新昌人曾祖讓官兩淮運司後遂占籍儀徵父全樂樸雅有古風欽隣登順治辛丑進士父亡奉母不就銓至康熙戊申始授廣西富川知縣縣新定欽隣百計撫綏循聲日著甲寅孫延齡叛於桂林逆兵犯平樂偽檄至富川欽隣

請援於督院未至偽將忽以兵圍城欽隣率親丁鄉勇戰却復至弁士有為賊內應者城陷欽隣巷戰不勝被執至平樂欽隣罵不屈送至桂林以兵守之賊欲授之官欽隣怒擲其印北向拜闕東向拜母作絕命詩曰反覆南疆遠辜恩逆醜狂微臣猶有舌不肯讓睢陽遂自縊死事聞贈卹如例後十餘年子孚嘉以蔭補官始比例請謚謚曰忠節

論曰忠而必責以死則為忠臣者難矣以余所次忠義之十自宋明迄今僅數人顧皆死者且舊志首列蕭舜俞又獨黜焉噫自古忠臣所處為極難耳若唐總轄之泅水拒敵即不死亦何損於忠彼舜俞者知勸豫以歸宋乃不免臣逆以偷生於義已悖何忠之有故論忠必要諸義不惟其死也考劉豫傳當時多勸沮者獨無舜俞名舊志或別有所據未可知余特以豫黨並其名削焉

贊曰事君無貳大義本天移孝作忠委質已然豈其膺仕而始勉
旃顛沛流離莫敢苟全甘之如飴白刃在前

廉介

宋柳植字子春揚子人舉進士甲科歷官至吏部侍郎平居畏慎
寡言笑所至官舍蔬果不采比歸家無長物時稱其廉

吳祥真州人從進士試年四十餘始中第為吉州軍事推官選開
封縣丞大臣稱其才遂為秘書省著作佐郎知考城縣歷知龍門
縣遷太常博士知蘄水縣父喪服除朝京師疾作遂歸初祥屢試
不第既刻苦事學率其弟務竭力養親及從事吉州弟死祥痛自
節為孤女數人營嫁在開封衣食常有不足而親舊至京相向如
歸喪父稱家以葬人或憂其貧欲出財以為基址祥曰貧吾素也
喪乃欲為利乎既歸僦屋以居卒年六十二幾不能葬

田文虎字炳叔寶慶初登進士第仕至樞密院檢校出知常州居
官極廉介妻子惟衣布素死之日家無餘資

明陳善字性初家世儀徵洪武間以貢入國學為上舍生後擢試
刑部廣東司主事尋以賢能階奉訓大夫進浙江司郎中任刑部
五年讞獄明允私託俱絕由是權倖沮抑四年遷朝列大夫廣西
左參議政聞於朝數加賜賚有交趾彭布政之任道卒無親從善
以禮殯斂送遺橐於其家里人韓知事謫戍廣西病死妻孥不克
歸善給行貲使還葬焉秩滿當代有德之者餽金二翼給為別物
俄覺其實弗及還竟投之於江遷河南按察司副使攝司事數月
審決冤滯八百餘人囹圄為空母憂服闋復除浙江獨持大體略
去苛細訟獄衰息指揮馮敬受盜金事覺罪之抵壺吏於法宣德
元年入覲卒於京師年五十三生平簡靜廉慎自號畏庵事親盡

孝居鄉退謹自安陋巷出不與馬衣不文繡俸入悉賙人急蓋自筮仕歷官三十年其操行介然如一日

羊冕字文中儀徵人宣德初應貢選高等授陝西延安府同知清慎有聲後以誤免歸冕即不冠服角巾布袍意恒坦裕有白行中者故延安諸生也常被冕恩至是轉運江淮特造冕第厚致餽焉冕堅辭惟受蔬果後遇赦應得冠服則歎曰吾乃因赦冠服耶竟不冠服士林服其狷潔

黃用字時用惟正之孫成化間領順天鄉薦授南吏部司務居職勤慎冢宰王饒少宰童軒咸器重之上部議復開國功臣爵之廢者言頗切至及委修部署作架閣庫經畫詳整考績賜勅獎諭弘治中秩滿進南京兵部職方員外又遷武庫司郎中遷貴州程蕃知府道病卒年六十五用為人厚重厲名節居官時嘗遇歲凶出

部庫羨金數千兩解應天以備賑恤吳大京兆甚稱其廉其歿也無以為殮郡守楊恩助之舉事

姜普字志大弘治間領鄉薦為處州府學訓導詢人以勤持己以潔顧亢於接上見御史郡守但長揖以是不容於時竟落職歸

吳志行字達夫生平渾朴沉毅領庚子鄉薦就選為河南歸德府司訓雅為太守李叔春所重委署考城築復攝永城循聲甚著憫民之多困於水也請蠲積逋四千九百有奇於是上臺交薦擢知江西玉山縣事治皆廉平後移王官掛冠歸

論曰傳有之曰貪夫殉利諒哉是言也真為州邑且千年其出而仕者衆矣獨四五人以廉稱不亦難乎顧此四五人者以今視昔廉亦有不同焉昔黃司馬號青萊黃柳太守至無以為殮未聞頌其廉者噫嘻是可以觀世風矣

贊曰飲水却金聞而知慕及已為之昧焉何誤情炎物交頓忘羞惡峻絕者誰毫無瞻顧願挹清風保此貞素

孝友

梁吳元嗣白沙村人子孫多壽百歲上下累葉同居不分至吳琬而惇義尤篤廣陵太守陳正平以事聞賜號義門置義順二臺以旌之

宋吳志興揚子縣塘下里人世篤孝義其家七世同居三百年室無私財又積而能散真揚之人稱為吳善士年九十三以高宗慶壽恩封迪功郎子汝明以孝著附錄於後靈芝生於堂側異木連理開禧間敵騎入境民居焚蕩其廬獨完兵後大疫其家四十口獨無恙人以為孝義之報嘉定間詔旌其門

明黃錫字仲允豫章黃庭堅裔家儀年十三喪父哀毀失明踰

年乃復補邑庠生奉母孫孝母卒廬墓畢制始歸少與陳端友善端卒族况放不恤其孤錫每於端忌日具奠其家枚因感悟遂日以睦正統間以經藝修明材德茂著舉徵為南京都察院檢校克善厥職遷北通政司知事成化初遷南都察院經歷性狷介謝絕餽遺時人語曰包公不持端溪硯黃公惟飲建業水其為人稱道如此

葉明字大新正德初舉鄉貢居母喪足不履外戶哀毀踰制成疾久而後愈以父老勉就祿養典教黃縣祇承親懽黃邑風澆明以身率教士習丕變

楊爾字國珍事其父出入必告晨夕定省不懈父有所適必迎於道或飲他所雖夜分不敢歸室既歸必俟寢而後退比歿哀禮踰常事母益篤貿易於市日必三返視食入廚滌器母飯斯飯母或

有不悅必長跽自責叩頭請罪曰必兒與婦逆也母顏解而後起
里人皆稱曰楊孝子

高尚志字雲溪嗜古篤學以屢舉不雋遊太學積分授光祿監事
遷東阿丞權知曲阜縣有循良聲居家孝友與仲兄尚珙同居義
不析財萬曆癸丑邑令增南城樓雉蓋由其請戊申大水饑凡賑
穀千石人咸德之姪思時伯兄珍遺腹子也撫之成立與其子思
景思明訓於一庭思時領鄉薦景明兩中副車所著有性鑑節要
五經約旨東遊集行世

沙稷字育民性至孝幼遭母艱衣毀骨立旣葬猶朝夕往哭聞者
悲之領嘉靖壬午鄉薦宴鹿鳴大痛以母不獲見也兩試春官不
第歎曰母不迨養父且臨年可常恃乎因就山東范縣教諭士皆
向化陞翰林孔目為太宰張羅峰所重擢工部主事轉員外郎奉

勅採木湖貴所得罰金盡貯公帑晉貴州右叅議加勅撫苗僅一
歲苗人服其恩信平居事繼母極孝老而彌篤蒙師朱表正無嗣
穆春秋必躬祀其墓年七十一卒

李恂年八歲喪父祖母莊氏母黃氏同孀居恂雖孩提即曲為承
順以盡奉養之道莊染老疾每親嘗湯藥以進娶婦兩日即往侍
母疾母亦尋愈友愛伯兄損貲讓地營事屢獎其孝友

沂字木道正統間伯父某為人所誣謫編開平軍伍天順大赦
伯猶在籍沂歎曰開平之役伯之不幸也吾為猶子顧不能雪之
耶即戒裝百金重趼上疏得釋

史得兄能為指揮坐法當死兄之嗣得請於官願以身代為之荷
校者幾十年兄竟出獄生子得喜曰今幸有此吾舉為不徒矣會
赦得並釋人咸義之

陳璉字廷玉儀徵人世業農璉與其兄耕樂友愛甚至耕樂無子璉始生子抱與鞠之再歲而殤繼與之復數歲而殤如是者三耕樂不可口吾弟之子猶子也已而乃勸卜妾卒無子日夕令子女遶膝以悅其心耕樂晚年為江臯六老會絕意家事璉亦喜曰兄之樂吾之志也怡怡終身士人稱之

侯新字允銘義民觀子生少其姪邦學數歲甫冠舉家事以聽邦學邦學推誠任之新待之若昆季及邦學卒新始自治家而撫愛邦學子無不帝其子曰吾愧不能報若父也新好賓客禮縉紳從無一失色於人不一絀議於官府以卒

李鵠字雲伯邑諸生博學洽聞試輒高等性至孝居親喪築廬墓旁朝夕上食如生時有白鶴朱蛸之瑞兄負賈人錢千緡鵠鬻產代償收債於昭陽里中逋者以歲澇請寬盡焚其券而返年八十

八卒其子祝萬歷癸酉舉人有文名

張淮學字宗尚父銑嘉靖間輸粟賑飢淮學敦行有父風嘗有兄弟爭財者將白於官淮學曰不觀乙普明事乎乃出金以寢其訟有貸者貧則焚券不責償常欲兄弟同居不得乃倍價買鄰宅以處弟通一門往來無間呂宗伯柎稱其篤義

周鳳字天瑞少為諸生有聲累舉弗第後以歲薦主吉安永寧縣簿初父逋客錢被訟逮治垂死鳳乃賣身傭直以救父急不得主乃詣燕客蘇榮榮為償客父得釋鳳詣榮傭弗納請質以宅亦弗許竟投券去後榮以他事被誣鳳為力辨獲免榮卒服衰以報人並高其義焉

李毓郡庠生性至孝少從張賓王遊以敦實行為學母歿築室墓側獨居三年

白所聞字獻廷世襲為衛指揮使取紉袴氣習篤行為善事寡母以孝聞朝夕必問所嗜寒暑必問所服四十餘年無異一日母死盡哀骨立由殯以及葬祭皆中於禮撫季弟所見衣必共筭食必同案萬歷初凡三督漕運後以捍城池卹軍士有功陞授大河總司上勞績計部卒

倪本彛可大第四子也崇禎丁丑霍邱破時父可大既罵賊死母戴氏方雉經賊將其手釧以刀斫戴指指盡落彛先已匿免聞之痛呼奮出以身翼蔽母屍中三十餘創僵仆衆屍中賊去復甦刀瘢如縷

國朝路登明字羽聖明經希周之孫有雋才順治壬辰以明經司訓遷瀏陽令未幾以疾歸先是天啓間伯兄雲造江舟十餘艘多載賈貨他舟嫉之有潤州人楊天麟之子往金陵僦舟子戚固載

以謾藏被劫殞命天麟跡至江干他舟人誣指雲訟於官拷訊誣服而無贓狀登明購捕獲罔得天麟物白兄雲無罪有司覆勘求重寤登明恃直不應遂為反坐褫名雲子之謙叩闔白其冤登明乃得以歲薦授官雲死登明事嫂如母誨姪如子年七十卒

湯名揚字觀川蘇之洞庭山人從其父佩家儀微與弟名顯名高相友愛父臨終謂揚曰吾負人千金計所有不及十之一二名高少恐不任也父卒揚即以所負自任悉力償之曰吾父志也名顯歿揚撫其子化分以私財為娶婦嫁其女二人名高以嗜酒破產揚輒復給之婦死更為娶婦揚生平恂恂若孺子卒年七十有七程願學字負若祖死於法父徙寧古塔願學以幼免成童以後思其親恒日夜泣為諸生不交一人人有延為師者往教焉自食於家雖杯茗無所啜屏除酒肉並不食菜果自食亦未嘗飽粗糲免

飢而已冬月則忍寒不衣綿纊蓋終身以喪禮自處年六十而卒
臨終戒其子勿與妻合葬以不知其父骸骨所在也里中稱之曰
苦行先生歿後邑人私謚之曰貞孝

孝行附錄

明徐文明 萬應徵 孔貞選 陳嘉試 柳 璩 經世緯

詹鍾吉 殷二友 殷湯達 金 湯 趙文炳 周文顯

國朝程桂生 董世榮 路之鼎 任三俊 陳 彝 宮于庭

詹鍾祥 錢尚志 經一儒 陳國柱 戴士誠 劉繼漢

張 翀

割股附錄

宋吳汝明 明詹大全 徐光裕 王維亮 王國輔

國朝李應婁 吳廣杰 張兆璉 劉駿烈 王定全 王 鑣

殷 趙 王家珍 張汝化 卞玉振

論曰割股非孝也帝舜不死於井廩曾子大杖則走守身所以事
親也父母有疾盡心於醫藥子職所當為者為之死生天命也未
聞割股可以救死至於因割而死傷親之心愈速親死未見其可
也按舊志載割股事甚夥甚至婦女割心割肝者尤愚而可憫余
類而叙之總名曰愚孝使後人知人心子事親有道無慕奇行博名
高也

贊曰百行所基莫先於孝本乎孩提至於華皓友于之愛天倫相
保門內無疵胡為其少庸德如斯宜則宜儆

儀徵志卷第二十

